



Polis paitim nius ripota em i sem pasin - *Midia Kaunsol* - **P4**

Laipstail

Ol Aitape bilong Rabaul - **P15**



COMBO SCHOOL DESK & CHAIR

Code: FT1061-GRN

Code: FT1061-BLU

ONLY **K264** inc. GST

Only at... **THEODIST LTD**
THE STATIONERY SUPERMARKET
Waigani Drive, POM Ph: 313 9800 sales@theodist.com.pg
Markham Road, LAE Ph: 472 5488 saleslae@theodist.com.pg

PROMOTION VALID UNTIL JULY 31ST 2016 OR WHILE STOCKS LAST

Tripela yunivesti i no stap gut

Lae Unitech wanpela sumatin i kisim bagarap...

Long UOG, ol sumatin i pait long ol yet taim sampela i laik stopim skul...

TRIPLELA bikpela yunivesiti long PNG i no stap gut taim bikpela trabel i kamap long las wik na dispela wik.

Ol sumatin bilong Yunivesiti ov PNG (UPNG), PNG Yunivesiti ov Teknoloji (Unitech) na Yunivesiti ov Goroka (UOG) i no stap gut taim dispela ol hevi i distebim skul bilong ol.

Long las wik, ol polisman long Pot Mosbi i sutim ol UPNG sumatin long Waigani Kempas taim ol i laik stopim ol sumatin long mekim protes mas i go long Palamen long tokim Praitim Minista Peter O'Neill long step daun.

Moa stori long pes 2...



Tok promis gen...

BIKPELA bilas na amamas i bin kamap long Yiwun ples Kairiru Ailan long de namba 3 bilong Jun. Bruder Andrew Singer SHB tokaut gen long ol promis bilong em. Ol pipel i amamas long selebretim jubili bilong Bruder Andrew Singer. Bruder Andrew i mekim planti wok long Boys Town long Wewak. Long displa kain ples, ol bruder i save helpim ol yangpela long taim ol bungim hevi bilong lo. Poto na stori: Bisop Jozef Roszynski, SVD. Moa stori long Sios pes 12

Buy Your Air Niugini Ticket

Anywhere, Anytime

Using BSP Mobile Banking.

Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.

Air Niugini

www.airniugini.com.pg

Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicebsp@bsp.com.pg www.bsp.com.pg

UPNG sumatin i no stap yet long klasrum

WANPELA sumatin bilong Yunivesiti ov PNG (UPNG) i tok tingting bilong em i no stap gut long go bek gen long skul.

Dispela sumatin bilong Westen Hailans i bin stap long fran lain long las wik Trinde taim ol polisman i bin sutim ol long gan.

Moa long 23 poroman bilong em i kisim katres na ol i stap yet long haus sik. No gat wanpela i dai.

Dispela boi, husat i pret long tokaut long nem bilong em, i tok em i bin lukim long ai bilong em yet olsem polisman i sutim stret ol sumatin, na dispela pret tingting stap yet long tingting bilong em.

“Tingting bilong mi no stap stret. Mi lukim ol (polisman) i makim mipela na, ol i sutim mipela stret. Laki na mi no kisim wanpela katres.

“Ol i tromoi tia ges i kam na mipela olgeta i paul. Mi long-long na pundaun i stap tasol laki na no gat wanpela katres i kisim mi.

“Mi lukim long ai bilong mi na narapela boi i kisim katres, na blut i kapsait, tasol arapela ol sumatin i karim em i go daun long Poroman sait,” em i tok.

Wantok Niuspepa i bin bungim dispela sumatin long

Morata long Tunde long dispela wik na em i bin autim dispela toktok wantaim ai wara.

Long Trinde long dispela wik, Wantok Niuspepa i bin go lukluk raun long Waigani Kempas.

Wan wan sumatin na sampela ol leksera i wok long raun long Forum Skwe, fran bilong bas stop na long fran bilong Yuni klinik.

Tasol i no gat wanpela sumatin i karim buk, pen na skul bek na i go kam long klasrum na skul.

i no gat wanpela leksera i kamap long ol bikpela lekserum olsem MLT, ALT na SLT.

Sampela sumatin na leksera i raun insait tasol ol i kaikai buai na simuk na planti i sanap long Forum na long klinik eria.

Planti bilong ol dispela sumatin em ol man tasol. Wan wan sumatin meri tasol i raun long skul.

Ples i stap isi tru na wan wan sumatin tasol i wok long raun long kempas.

Sekyuriti long maus rot em bin tait tumas. Ol Uniforce sekyuriti i blokim rot na ol i stopim ol nius manmeri long go insait long kempas.

Wanpela sekyuriti man bilong Uniforce, husat i bin stap wantaim arapela 4-pela wan-

wok bilong em, i bin tokim Wantok Niuspepa olsem ‘ol bos lain i stopim’ol nius manmeri long kam insait long kempas.

Wantok Niuspepa i bin lukim tupela 10-sita Toyota Len Krusa polis kar i gat mak bilong SSD mobail skwat i stop arere long Drill Hall ka pak taim ol Uniforce i blokim rot i go insait long kempas.

Las wik Sif Seketeri Isaac Lupari i askim ol sumatin bilong UPNG long go bek gen long skul na ol i no ken kamapim protes gen na lusim skul.

Mista Lupari i bin bung wantaim Polis Komisina Gari Baki, Vais-Sensela bilong UPNG, Profesa Albert Mellam, na arapela memba bilong Nesanel Sekyuriti Kaunsil long las wik Fraide long Pot Mosbi.

Mista Lupari i tok gavman i westim bikpela mani long givim fri edukesen na kirapim gen ol infrastraka bilong edukesen olsem klasrum na domotri long UPNG.

“Mipela i laikim ol sumatin long go bek gen long klasrum na skul gen. Ol i no ken kamapim protes gen. Ol i no ken lusim skul,” em i tok.

Profesa Mellam i tok dispela boikot na protes mas we SRC i go pas na pulim ol sumatin long

mekim, em i iligel bikos Yunivesiti Kaunsil i no bin givim tok orait long ol long namba wan de yet taim ol i statim.

Bihain long ol polis i sutim ol sumatin, planti bilong ol i pret long go bek gen long skul.

Narapela sumatin, husat i bin raun long Waigani Kempas, long Trinde long dispela wik, i tokim Wantok Niuspepa olsem: “Tingting bilong mi i no stap stret. Mi pret long go stap insait long klasrum.

“Mi no kisim wanpela buk o pen i kam long skul. Taim ol arapela poroman bilong mipela i stap long haus sik, mipela i no pilim gut long go skul na kisim save.

“Mipela i sanap wantaim long rausim Praisim Minista Peter O’Neill na taim ol kisim bikpela bagarap na stap long haus sik, mipela i pilim nogut long go skul,” em i tok.

Dispela sumatin i no laik long tokaut long nem bilong em.

Las wik Polis Komisina Gari Baki i tok ol polisman bai mekim wok painimaut long sekim gut as bilong dispela trabel i kamap long UPNG.

Komisina Baki i bin tok ol polisman i bin ‘faiarim woning sot i go antap’ long salim ol sumatin i go bek gen long kempas.

SRC bai bihainim kot oda

PRESIDEN bilong UPNG Student Ripresentativ Kaunsil (SRC), Kenneth Rapa, i tok Nesanel Kot i stopim ol sumatin long mekim protes gen na ol sumatin i wanbel long dispela disisen bilong kot.

Mista Rapa i tok ol bai bihainim dispela kot oda na ol bai no ken mekim gen sampela moa protes.

Tasol Mista Rapa i tok save i stap long ol wan wan sumatin. Sapos ol i laik go bek gen na skul, o sapos ol i laik lusim skul long nem bilong kantri, dispela disisen em i stap long han bilong wan wan sumatin, na SRC bai no inap fosim ol.

“Sapos ol i laik protes, o lusim skul, o go skul gen, em i laik bilong wan wan sumatin. SRC bai no i nap fosim ol sumatin long mekim protes, o stopim ol sumatin long go long skul.

“Dispela pait em i no pait bilong SRC tasol, em i pait bilong PNG. Mipela olgeta sumatin long UPNG i wanbel na laikim Praisim Minista Peter O’Neill long step daun na larim ol Polis Frod Skwat i mekim wok bilong ol,” Mista Rapa i tok.

Las wik, Vais-Sensela bilong UPNG, Profesa Albert Mellam, i bin askim ol sumatin long go bek long skul taim ol polisman i bin sutim ol sumatin.

Profesa Mellam i bin tok aut tu olsem Yunivesiti Senet na Kaunsil i no bin givim tok orait long larim dispela protes mas i kamap.

Long dispela as, Profesa Mellam i tok dispela protes mas i bin iligel.

Las wik Praisim Minista Peter O’Neill i bin tokim Palamen olsem gavman bai kamapim wanpela Komisin ov inkwairi (Col) i go insait long sekim gut husat i bin asua bihain long moa long 23 sumatin i kisim bagarap long han bilong polis.

Mista O’Neill i tok em i les long dispela kain hevi i kamap, na em i bin bekim ol askim bi-

long ol sumatin long wanpela petisen ol i bin givim long em tupela wik i go pinis.

Mista O’Neill i tok gavman i putim moa mani i go insait long sapatim ol sumatin long kisim gutpela kwaliti edukesen, ne em i no laikim ol sumatin long lusim skul.

Em i tok gavman bai kamapim dispela wok painimaut long sekim husat i asua.

Tasol Mista Rapa i tok ol sumatin i laikim ol indipenden bodi olsem Yunaited Nesen (UN), Komonwelt o arapela ausait manmeri long mekim dispela wok painimaut.

Tripela yunivesiti i no stap gut

I kam long pes 1...

No gat wanpela sumatin i bin dai, tasol moa long 23 sumatin, man na meri wantaim, i kisim bikpela bagarap na sampela i stap yet long haus sik.

Nesanel Kot i givim wanpela oda las wik Fraide long tokim ol sumatin long stopim protes na go bek gen long skul.

SRC Presiden bilong UPNG, Kenneth Rapa, i tok ol bai bihainim dispela kot oda na bai no moa mekim gen protes o lusim skul.

Tasol sampela sumatin i tok ol i pret long go bek gen long skul bikos polis i wok long go kam long kempas.

Kot oda i tokim ol sumatin long go bek gen long skul long dispela wik Tunde bihain long ol sumatin i no bin go long skul inap 6-pela wik olgeta.

Long Unitech, ol ripot i tok ol sumatin yet i statim pait long dispela wik Mande, na dispela i lukim wanpela sumatin i kisim bikpela bagarap.

SRC Presiden David Kelma i tok dispela pait i bin kamap taim ol i laik tokim ol sumatin olsem ol bai stopim protes na go bek gen long statim skul.

Tasol sampela ol sumatin i no bin wanbel na statim dispela pait, we dispela i lukim sampela sumatin i katim wanpela sumatin (man) wantaim bus naip.

Unitech Vais-Sensela, Dokta Albert Schram, i tok dispela man i stap yet long haus sik, na em i bilip olsem ol sumatin bai go bek gen long skul.

Long UOG, ol ripot i tok ol sumatin yet i pait long Tunde long dispela wik taim sampela sumatin i laikim ol long stopim skul.

Ol ripot i tok ol fainel yia sumatin i bin les long stopim skul o mekim protes moa, tasol sampela i bin les long go long klasrum.


Dispela i lukim ol sumatin yet i kamapim bikpela pait long Goroka.

Klostu long 50 sumatin husat i kisim bagarap i stap long Goroka haus sik na Not Goroka klinik.

Sif Seketeri bilong Gavman, isaac Lupari, i tok em bai bungim fopela vais-sensela bilong dispela tripela yunivesiti na Yunivesiti ov Nesurel Risos na Envairomen (UNRE) long stretim dispela ol hevi na larim skul i ran gut.

Mista Lupari i tok em bai bungim ol vais-sensela bilong dispela fopela yunivesiti na toktok wantaim ol long daunim na stopim kain ol hevi.

Mi tingim bifo taim Flame stockfeed i bin nambawan kwaliti na value stockfeed bilong ol pik bilong mi...
nau emi kam bek!
WELKAM BEK!



Stretim siti trenspot sistem

GAVANA bilong Nesenel Kapital Distrik (NCD), Powes Parkop, i laikim Dipatmen ov Trenspot long putim ol CCTV kamera long olgeta rot na strit insait long Pot Mosbi.

Mista Parkop i tok long Pot Mosbi siti tasol planti gavman ejensi i wok long putim rot blok na kamapim trefik jem .

“Mi laikim Trenspot Dipatmen long senisim dispela sistem bilong putim rot blok na sekim kar. Dispela i wok long kamapim trefik jem long siti bilong yumi,”Mista Parkop i tok.

Em i tok sampela bikpela siti long wol i gat ol CCTV kamera na ol wokman i save putim ai long kamera na sekim ol kar.

Mista Parkop i laikim Trenspot Dipatmen long bihainim dispela kain stail bilong arapela ol bikpela siti long wol, na putim CCTV kamera long rot.

Em i tok long Pot Mosbi kain kain wokman bilong gavman ejensi i save putim rot blok long laik bilong ol yet na kamapim trefik jem.

“Nesenel Rot Sefti Atoriti, Moto Viakoli Insurens, Trafik Opis bilong Polis, ol yet i save putim rot blok long laik bilong ol yet.

“Wanpela ejensi tasol insap long mekim dispela wok. Yumi mas lukluk long dispela. Em i no nidim tripela o fopela gavman ejensi long mekim.

“Nau olgeta samting i kamap isi wantaim moden teknoloji. Yumi

mas kamapim nupela sistem. Rot blok i kamapim trefik jem. Trenspot Dipatmen mas lukluk long putim nupela sistem na wanpela em long putim CCTV kamera long olgeta rot na strit.

“Ol rejistresin namba bilong kar bai kamaut long kompyuta sapos kamera i kisim wanpela kar i asua na brukim trefik lo,”Mista Parkop i tok.

Mista Parkop i tok ol wokman bilong sekim kar i mas go tu long ol bas stop olsem Hohola, Boroko na Waigani na kontrolim ol PMV bas.

“Ol bas stop bilong yumi long Pot Mosbi i pulap wantaim bas na kar. Na mi no save lukim ol dispela trefik opisa i kontrolim ol PMV bas long ol bas stop,”Mista Parkop i tok.

Trenspot Minista Nixon Duban i tok dipatmen bai lukluk long dispela na stretim ol samting long larim Len Trenspot i stap gut, wankain olsem long arapela ol bikpela siti long wol.

Em i tok ol i no makim ol bod memba bilong Len Trenspot Bod. Em i tok taim nupela bod i stap, ol bai lukluk long ol toktok bilong Gavana Parkop na statim dispela nupela sistem long Pot Mosbi na bihain skruim i go moa long arapela siti na taun long kantri.

“Mi wanbel long dispela toktok. Mipela bai stretim,”Mista Duban i tok.

Pok: Rikrutmen bilong PNGDF kamap stret

DIFENS Minista Dokta Fabian Pok i tok rikrutmen o kisim manmeri long wok bilong Papua Niugini Difens Fos (PNGDF) i save kamap stret na i no gat wanpela paul pilai o wantok sistem i save kamap.

Dokta Pok i autim dispela toktok long Palamen long las wik Trinde taim Deputi Oposisen Lida Sam Basil i askim sapos em i save long sampela kain pasin bilong mekim wantok sistem i kamap long PNGDF.

“I no gat wanpela wantok

sistem i kamap long rikrutmen bilong nupela soldia long joinim PNGDF. Olgeta lo na polisi bilong mekim rikrutmen i stap, na ol rikrutmen opisa i save bihainim dispela polisi,”Dokta Pok i tok.

Mista Basil i tok planti pasin bilong wantok sistem i wok long kamap long PNGDF, na wanpela bilong ol em long sait bilong rekrutmen bilong ol yangpela na nupela soldia.

“Rekrutmen i no go stret, na planti wantok sistem i wok long kamap. Long rikrutmen bilong las yia, mi painimaut

olsem 70 pesen bilong ol nupela soldia em i ol mangi Sauten Hailans tasol.

“30 pesen i kam long Hela na Jiwaka. Mi laik askim Difens Minista sapos dispela em i tru o no gat,”Mista Basil i tok.

Dokta Pok i tok dispela tok tok bilong Basil i no tru. Em i tok PNGDF rukrutmen opisa i save bihainim polisi bilong mekim rikrutmen.

“Ol mangi bilong mi long Jiwaka i sikirap long kamap ami. Tasol mi no salim wanpela bilong ol i go long ami.

“I gat lo na polisi bilong mekim rikrutmen i stap. Ol i mas bihainim. No gat wanpela wanpela pasin bilong wantok sistem i kamap.

“Sapos yu i laik lukim long ai bilong yu, mi ken kisim yu i go long Murray Barracks na yu yet bai lukim long ai bilong yu.

“Mi bai askim yu long kam lukim ol nupela soldia i pas aut long Goldie. Em ol i no bilong Sauten Hailans, Jiwaka na Hela tasol. Ol i miks manmeri i kam long olgeta hap bilong Papua Niugini,”Dokta Pok i tok.

PNG Pawa pasim Maun Hagen Opis

PNG Pawa Limited Koporet Rilesens long dispela wik i putim aut wanpela tok save i go long ol pablik olsem opis bilong ol long Maun Hagen em bai pas long sampela taim bikos ol trabel man i bin brukim opis na stilim ol samting bilong wok.

PNG Pawa Ltd i tok ol lain kastoma bilong ol husat i save kisim sevis bilong pawa long Maun Hagen Bisnis Opis bai wet sampela taim liklik inap ol i stretim olgeta opis na ol ikwipmen insait long opis long bai op gen long wok.

Bikpela bagarap i kamap long opis bilong PNG Pawa taim ol trabel man long strit i brukim opis na stilim ol kompiuta, laptop, printa ol telepon na ol tebol na sia bilong opis.

PNG Pawa Ltd Koporet Rilesens i tok dispela kain pasin

bilong ol trabel man i bagarapim opis na stilim olgeta masin na ol arapeal ikwipmen bilong wok na em i rabis pasin tru tasol ol i tok sori tru long ol gutpela kastoma bilong ol long dispela kain hevi i kamap.

Palamen bai sindaun gen long Ogas 2

LIDA ov Gavman Bisnis na Fainens Minista, James Marape, i adjonim o surukim Palamen i go long Ogas 2.

Las wik Trinde, ol Memba bilong Palamen i bin bung na toktok long planti ol isu bilong dispela kantri.

Wanpela bikpela toktok ol memba i bin toktok long Palamen em long ol polisman i sutim ol sumatin bilong UPNG long moning long dispela de.

Memba bilong Rabaul Dokta Allan Marat i bin askim Praim Minista Peter O'Neill long lusim sia na risain bikos em i gat planti asua, na nem bilong em i bagarap pinis.

Tasol Praim Minista O'Neill i bin tok dispela olgeta toktok long asua bilong em i stap yet long kot, na kot i no painimaut olsem em i brukim lo.

Memba bilong Sinasina-Yongomugl, Kerenga kua, i bin singaut strong long Mista O'Neill i mas lusim sia, na larim Polis Frod Skwat i mekim wok.

Tasol Mista O'Neill i strongim sait olsem no gat wanpela man em i asua sapos ol isu i stap yet long kot.

Gavana bilong Sauten Hailans William Powi i bin sapatim Mista O'Neill.

Mista Powi i tok i gat tupela

rot tasol i stap long makim na rausim praime minista.

“Long floa bilong Palamen Haus na long nesenel ileksen taim. Dispela tupela rot tasol i stap. Ol sumatin i no gat rait long tokim Praim Minista long step daun o lusim posisen em i holim,”Mista Powi i bin tok.

Memba bilong Aitape-Lumi, Patrick Pruaitch i bin singaut strong long Dokta Marat na tok; “Em ol husat?” Mista Pruaitch i tok long ol sumatin bilong UPNG, husat i laikim Mista O'Neill long step daun.

Mista Marape i tok planti hevi i kamap long Mosbi siti

na long kantri, na em i askim Deputi Spika Aide Ganasi long skruim sindaun bilong Palamen i go long Ogas 2.

Tasol Oposisen Lida Don Polye i belat long dispela pasin bilong Deputi Spika long harim toktok long gavman na skruim sindaun bilong Palamen i go long Ogas 2.

Mista Polye wantaim ol memba long Oposisen i go long kot long askim sapos Mista Ganasi i bihainim lo stret long skruim Palamen.

Oposisen i tok gavman i no ken yusim namba long ranim kantri olsem wanpela komunis kantri.

Pay for Air Niugini Tickets via BSP Mobile Banking

Obtain a booking reference from Air Niugini website www.airniugini.com.pg, Call Centre on 180 3444 or any Sales Office prior to making the payment.

Dial *277# To Pay

Available to bmobile-vodafone & Digicel subscribers. Mobile service charges apply.



320 1212 / 7030 1212 - 24/7
 servicebsp@bsp.com.pg
www.bsp.com.pg

Gavana Jeneral go long bon de selebresen bilong Kwin

Gavana Jeneral bilong Papua Niugini, Gren Sif, Sir Michael Ogion wantaim meri bilong em, i bin go long London, Inglen las wik long stap witnesim bon de selebresen bilong Kwin Elizabeth II long Fonde 10 June.

Gavara Jeneral na Lady Esmie Ogio i bin lusim Pot Mosbi long go long London bikos em i bin kisim singaut i kam long opis bilong Kwin bilong Inglen long go na stap long bon de ne-

senel Tenkyu Sevis na belo kaikai long makim 90 bon de bilong Kwin long Sen Paul Katidral na long Moresby over the weekend.

Buckingham Palace long June 10 long makim bon de bilong Kwin. Bon de tru bilong Kwin em long Epril 21, 1926 na em i stap wanpela olupela kwin tru i stap olsem Kwin longpela taim winim olgeta narapela king na kwin bilong Inglen bipo i bin stap. Opisal selebresen bilong

bon de bilong Kwin em i save kamap long mun Jun na long dispela yia em ol i makim de 11 Jun.

Ol selebresen i stat long Epril na bai pinis long dispela mun.

Long London ol bai selebretim wantaim ol mil-itri paraid bilong ol kain kain kala yunifom bilong ol soldia na ami long ol kain kain wok ol i save holim aninit long Kingdom gavanens bilong Inglen. Ol soldia wantaim ol gat bai mas i go long ai bilong Kwin na ol

opisal na ol pablik olsem mak bilong dispela de selebresen.

Kwin Elizabeth em i Het ov Stet bilong Papua Niugini, Gavana Jeneral em i man husat i makim Kwin long kantri, olsem na ol i singautim em i go long ol dispela opisal selebresen.

Gavana Jeneral bai kam bek long Jun 16 2016. Spika bilong Nesenel Palamen, Theodore Zurenuoc bai mekim wok bilong Vais Rigel olsem ekting Gavana Jeneral.



Gavana Jeneral Gren Sif Sir Michael Ogio i sekhan long Kwin Elizabeth II bilong Inglen.

Polis paitim nius ripota em i sem pasin

MIDIA Kaunsil bilong Papua Niugini i tok pasin we ol opisa bilong Royol PNG Konstabuleri (RPNGC) i mekim long taim ol i paitim na kikim wanpela meri nius ripota bilong NBC redio long las wik Trinde em i sem pasin stret.

Nesenel Brodcasting Koporesen (NBC) nius ripota Rose Amos i bin stap long kisim nius bilong ol sumatin bilong Yunivesiti bilong PNG long taim ol polis i bin stopim ol long go bringim petisen bilong ol i go long palamen haus long Praim Minista Peter



Alexander Rheoney, Presiden bilong Midia Kaunsil bilong Papua Niugini.

O'Neill long las wik Trinde. MCPNG ripot i tok Mis Amos i bin ran i go long ol

polis opisa long hait long pait we i kirap namel long ol polis na ol sumatin long hap bilong yunivesiti, tasol wanpela polisman wantaim gan i kirap long paitim em na em i pundaun na narapela i stat long kikim em.

Maski em i putim siot i gat sain bilong NBC ples kliia, dispela i no stopim ol polisman long paitim em.

Taim namba tri polisman gen i paitim Mis Amos, em dispela taim wanpela senia polis opisa i kam na stopim ol na i kisim Mis Amos i go insait long wanpela RPNGC Toyota Len krusa.

"Mipela i no laikim tru kain pasin bilong brukim lo we tripela polisman olgeta i paitim Mis Amos taim em i ranawe long pait na i laik hait baksait long ol polis. Long kain taim olsem em i stret long ol jenelis long painim ples hait baksait long lo. Tasol sori tru olsem long dispela taim, lo man i tanim na kamap ol man bilong brukim lo na ol i birua long ol lain we ol i mekim tok promis long banisim na lukautim ol," MCPNG Presiden, Alexander Rheoney i tok.

Ol i yusim ol gan long stopim wanpela demonstrasen i no gat samting bilong pait, em i no gutpela tru na wanpela wok painim aut i

mas kamap nau tasol long save husat tru i givim tok oda long ol polis i sutim gan na tu dispela kain pasin ol i mekim em i stret o no gat," MCPNG Presiden i tok.

Mista Rheoney i tok: "Sapos ol pipel bilong Papua Niugini i laik holim wanpela demonstrasen wantaim pasin bel isi long tokaut long bel hevi bilong ol, bilong wanem bai ol i yusim ol gan long stopim? Ol pipel bilong Papua Niugini i gat rait long autim bel hevi bilong ol olsem na bilong wanem bai ol polis i pasim maus bilong ol wantaim gan?"

Pasin ol i mekim long Mis Amos i bin kamap wanpela wik tasol bihain long sampela polis i no gat yunifom i bin paitim wanpela nius ripota bilong komesel TV stesin, TVWAN, Imelda Wavik ausait long Boroko Polis Stesen.

"Pasin birua long ol nius ripota i wok long kamap planti taim nau na planti taim em ol memba bilong konstabuleri na em i no gutpela long komyuniti.

Em i taim nau long Polis Komisina i mas lukluk long disiplin insait long renk na fail bilong RPNGC na long holim pasim ol opisa husat i mekim kain sem pasin long bagarapim nem bilong konstebuleri." Mista Rheoney i tok.

MCPNG i tok long olgeta lain husat i stap insait long hevi bilong yunivesiti sumatin protes long pasim ol yet long ol i no ken kamapim pait na birua.

Lo man i no ken pasim wok bilong midia

PRESIDEN bilong Pasifik Ailan Nius Asosiesen (PINA), Moses Stevens i tok strong long ol opisa bilong lukautim lo insait long Pasifik Rijon i mas no ken pasim wok bilong midia.

Mista Stevens i mekim dispela strongpela toktok long strongim toktok bilong Presiden bilong Midia Kaunsil bilong PNG (MCPNG) na Ekting Menesing Dairekta bilong Nesenel Brodcasting Koporesen las wik long pasin ol polis opisa i bin mekim long ol sumatin bilong Yunivesiti bilong PNG na long tupela nius ripota.

Presiden Stevens i tok, PINA i no wanbel long ol memba bilong RPNGC i paitim wanpela nius ripota na long sutim gan long ol sumatin bilong Papua Niugini Yunivesiti long taim ol i protes long gavman las wik.

PINA i tok strong long ol lain bilong lukautim lo insait long Pasifik rijon long ol i no ken pasim wok bilong midia na ol i no ken mekim ol pret.

PINA Presiden Moses Stevens i wok long strongim toktok bilong Presiden bilong Midia Kaunsil bilong Papua Niugini (MCPNG) na Menesing Dairekta bilong Nesenel Brodcasting Redio (NBC) long wei ol polis opisa i yusim ol gan long stopim ol Yunivesit sumatin long wokim protes long Pot Mosbi long Trinde las wik.

MCPNG Presiden, Alexander Rheoney i bin hariap long toktok daunim dispela kain pasin we ol polis i bin wokim. Em i tok, pasin bilong yusim ol gan long stopim ol sumatin husat i no gat samting bilong pait em 'I no gutpela stret' na 'i mas gat wok painim aut long dispela hariap tasol'.

Ol yunivesiti sumatin i bin wok long pasim ol klas moa long wanpela mun bikos ol i

bin laikim Praim Minista bilong Papua Niugini, Peter O'Neill long lusim sia bilong em na larim ol polis i mekim wok painimaut long sampela pasin korapsen na mismenesmen bilong pablik mani.

PINA Presiden i tok fridom bilong ol sitisen long tokaut long wanem kain tingting em i demokretik rait bilong olgeta pipel bilong Pasifik Ailan rijon na Papua Niugini pipel em wanpela bilong ol.

Pasin bilong yusim ol gan em i nogut tru na em i mas no ken kamap long Pasifik Rijon.


Mista Stevens i tok rabisim pasin we ol polis i bin wokim long paitim wanpela meri nius ripota bilong NBC, Mis Rose Amos long dispela taim bilong stopim ol sumatin bilong yunivesiti long Trinde las wik.

Em i strongim toktok bilong ekting Menesing Dairekta bilong NBC olsem dispela kain pasin em i no 'gutpela stret'.

Em i tok dispela hevi we i bin kamap long Mis Amos i bihainim tu narapela hevi i kamap long narapela meri nius ripota, Imelda Wavik bilong TV stesin TVWAN we ol polis opisa husat i no putim polis yunifom i bin paitim em long Boroko Polis Stesin.

PINA Presiden i tok em i wari long ol kain pasin bilong stopim na bagarapim ol nius ripot long Papua Niugini na em i tok strong long gavman na ol lo ejensi long wok wantaim ol midia na ol i no ken wok birua long midia na larim ol i mekim ol wok bilong ol.

PINA Presiden i singaut gen long ol gavman bilong ol Pasifik Ailan kantri long rispekim Fridom bilong Midia na banisim ol nius ripota long mekim gut ol wok bilong ol.



Wantok niuspepa i laikim ol eijen insait long Madang, Kimbe, Kundia, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: 325 2500 o Mobail namba: 7384 6688 o email i kam long: seovo@wantokniuspepa.com

Planti manmeri ausait i no wanbel long polis

PLANTI manmeri long wol i sapotim ol sumatin bilong Yunivesiti ov PNG (UPNG), na ol i belat long ol polisman husat i sutim ol sumatin long Waigani Kempas long las wik.

Seketeri Jeneral bilong Yunaited Nesens, Ban Ki-moon, em i kamap namba wan wol lida long toktok strong long ol polisman i no ken sutim ol sumatin.

Mista Ban Ki-moon i autim dispela toktok las wik Trinde taim em i harim olsem ol sumatin i kisim katres na sampela i stap long haus sik.

Maus man bilong Ki-moon, Stephan Dujarric, i tok Seketeri Jeneral i laikim bel isi na pasin rispek long larim dispela kain pisful protes na fridom ov asembli i mas kamap aninit long law, na i no wantaim gan.

Em i tok Mista Ki-moon i laikim gavman long stretim dispela hevi na em i toktok strong egensim dispela kain pasin bilong ol polisman long sutim ol sumatin long gan.

Long las wik Sarere, planti ol manmeri long Sydney, Australia i bin protes egensim gavman bi-



Ol manmeri long Sydney, Australia i holim ben na protes egensim polis.

long PNG na polis.

Ol i bin holim ol bena na bikipela notis, na dispela ol notis i tok, ol i sapotim ol sumatin bilong PNG.

Nesene Union ov Students bilong Australia i bin autim bikipela belhevi bilong ol long polis i sutim ol UPNG sumatin.

Ol i bin raitim wanpela pas i kam long ol sumatin bilong UPNG na dispela pas i tok ol yunivesiti sumatin long Australia i stap baksait long ol sumatin bilong UPNG.

Long Malaysia, ol sumatin long yunivesiti i bin protes i go long Hai Komisn Opis bilong PNG long Kuala Lumpur, na toktok strong long ol polisman i no ken sutim ol sumatin.

Moa long 50 sumatin bilong Malaysia i bin sori nogut tru na ol i bin autim belhevi tingting bilong ol long las wik Sande.

Long Saina, sampela ol PNG sumatin i skul i stap long hap, i bin protes tu na autim belhevi bilong ol.

Ol i bin belat long polis i sutim ol sumatin long gan.

UPNG stap yet long haus krai



Ol UPNG sumatin i penim pes wantaim graun na mas long UPNG kempas long soim olsem ol i stap long haus krai bilong moa long 23 sumatin ol polisman i sutim long las wik Trinde long Waigani Kempas.

OL sumatin bilong Yunivesiti ov PNG (UPNG) i stap yet long haus krai bilong arapela ol poroman bilong ol husat i bin kisim bagarap na i stap yet long haus sik.

Moa long 23 sumatin, man na meri wantaim, i bin kisim katres long las wik Trinde moning taim polis i bin sutim ol long Waigani Kempas.

Long Mande long dispela wik, ol sumatin i penim pes na bodi bilong ol wantaim graun na ol i mas long UPNG long soim

olsem ol i stap yet long haus krai.

Adminstresen bilong UPNG i tokim olgeta sumatin long go bek gen long skul long dispela wik Tunde.

Kot tu i bin givim wanpela oda long SRC i no ken kamapim protes moa, tasol i mas larim ol sumatin i go long klas.

SRC na ol sumatin i bihainim dispela oda na ol i go bek gen long skul, SRC Presiden Kenneth Rapa i tok.

Ol papamama bilong ol

sumatin husat i kisim katris i no wanbel long gavman na ol i laikim Prais Minista Peter O'Neill long step daun o raus long posisen bilong em.

Jacob Apa, husat i papa bilong wanpela sumatin husat i kisim bagarap, i tok ol polisman i mas yusim het, na i no ken sutim ol man nating.

"Dispela pasin bilong ol polisman long sutim ol manmeri wantaim gan bilong gavman i no gutpela pasin.

"Pikinini bilong mi i stap long

haus sik yet. Mi laikim gavman i mas mekim wok painimaut na sekim husat polisman stret i sutim ol sumatin.

"Mi bai kisim gavman i go long kot na bai mi kisim i go long kot dispela polisman husat i sutim pikinini bilong mi.

"Mipela ol papa mama nau i joinim ol pikinini bilong mipela na mipela i stap long haus krai wantaim.

"Mi bai kotim stet na polisman husat i sutim pikinini bilong mi bihain long dispela haus krai," Mista Apa i tok.

Ombusman Komisen bai wokim inkwairi

OMBUSMAN KOMISEN bilong Papua Niugini i tokaut pinis olsem em bai wokim wanpela wok painimaut bilong em yet, long hevi we i kamap namel long ol polis opisa bilong Royol PNG Polis Konstabulari na ol sumatin bilong Yunivesiti bilong Papua Niugini long Pot Mosbi long las wik Trinde 8 Jun.

Ekting Sif Ombusman, Phoebe Sangetari i tok olsem Komisen bai wokim dispela wok painimaut long soim olsem Ombusman Komisen i gat pawa long wokim investigates bilong em yet aninit long Ogenik Lo bilong Ombusman Komisen.

As tingting em long dispela wok painimaut bai mekim klia olsem ol pablik sevan na ol ejen bilong gavman bodi i wokim rong pasin o no gat, olsem ol i no bihainim lo o i no stret na ol i yusim strong bilong ol long daunim ol narapela em i bihainim lo o no gat.

Narapela samting em long mekim klia sapos sampela tingting no gut i stap baksait long dispela hevi o no gat, o sapos ol i paul na abrusim mak bilong wok bilong ol, o ol i bihainim wanpela lo we i no klia tumas long ol, o sapos ol i no kisim gut tok-save long wanem samting ol i mas mekim.

Ombusman Komisen i laik tokim pablik olsem wok bilong OC long mekim wok painimaut em i narapela olgeta long Lidasip Kod fanksen, we i save kamap long taim ol i gat sampela tingting olsem ol lida i mekim rong aninit long Lidasip Kod 26 bilong Konstitusen o Mama Lo. Investigesen bilong Lidasip Kod em o i save bihainim Ogenik Lo bilong ol Diuti na Risponsibiliti bilong Lidasip.

Olgeta wok painimaut bilong OC bilong rong pasin i kamap aninit long Ogenik Lo bilong en, o mekim rong pasin aninit long Ogenik Lo bilong Diuti na Risponsibiliti bilong Lidasip i save kamap long ol yet, na long ples hait, bikos Ombusman Komisen em i wanpela independen konstitusen institusen we i no gat man bai bosim wok bilong en.

Ol sumatin bilong Yunvesiti bilong Goroka kisim bagarap



Sampela ol sumatin husat i bin painim birua long pait long Yunivesiti ov Goroka long Tunde dispela wik. Ol i go kisim tritmen long Goroka Provinsel Haus Sik long Isten Hailans.

Poto: Loutova Siapea.

Loutova Siapea i raitim

I GAT 50 yangpela sumatin man long Yunivesiti ov Goroka long Isten Hailans i bin kisim bagarap bihain long pait i bin bruk namel long ol yet long Tunde dispela wik.

Dispela pait emi kamap bikos long pasin bilong ol sumatin i kisim alkohol na

spak na bringim i go insait long yunivesiti kempas na kamapim pait long hap.

Ripot we i kam long opis bilong Isten Hailans Provinsel Helt Atoriti i tok, Goroka Provinsal Haus sik i bin tokaut olsem ol i bin kisim 4-pela aua long imejensi long lukluk na stretim ol sumatin husat i bin kisim bagarap long dispela pait.

Wantok nius i bin kamap,

lukim na toktok wantaim ol sumatin husat i bin kisim bagarap stap insait long Goroka Haus sik.

Sumatin na mausman Jackson Karenghe husat em presiden bilong Enga Sumatin Asosiesen i tok, dispela hevi em i kamap long spak pasin bilong ol sumatin yet na ol pait na kisim bagarap.

UPNG stori pairap long moa long 40 intenesenel midia

SIF Seketeri Isaac Lupari i no wanbel long ol nius manmeri na em i tok gavman bai mekim wok painimaut i go insait long sekim sapos ol midia i bin mekim wok stret.

Mista Lupari i bin belat tu long Intenesenel Midia i tok 4-pela sumatin i dai long las wik Trinde long han bilong ol polisman.

Moa long 40 intenesenel midia o niuspepa, redio na televisen i bin pairapim dispela stori bilong polis i sutim ol UPNG sumatin.

Long Trinde, Fonde, Fraide na Sarere las wik, dispela stori i bin hot stret long wol, na planti manmeri long wol i ridim, harim na lukim dispela nius pinis.

Tasol seketeri bilong Foren Afeas, William Dihm, i no bin wanbel long ol foren midia i no bin sekim gut ol samting, na ranim stori hariap tru.

Planti ol dispela foren midia olsem ABC, Sydney Morning Herald, New York



Wanpela sumatin i kisim bikpela bagarap taim ol polisman i sutim em long UPNG long las wik Trinde.

Times na arapela midia ogenesen i bin tok 4-pela sumatin i dai long han bilong ol polisman.

Tasol no gat wanpela sumatin i bin dai.

Polis Komisina Gari Baki

i bin tok 23 sumatin, man na meri wantaim, i bin kisim bagarap taim polis i sutim katres i go antap long stopim ol i no ken kam ausait na protes i go long Palamen.



PABLIK NOTIS

Ol narapela lain i no ken givim sevis long ol Memba bilong Nambawan Super

Nambawan Super (NSL) i laik toksave long olgeta pablik olsem ol memba bilong Nambawan Super i save kisim sevis bilong ol wantaim 17 sevis senta bilong mipela, na ol brens (planti long Post PNG Opis) insait long Papua Niugini na i no wantaim ol narapela lain.

NSL i gat wanpela namba wan atometik sistem i stap long givim sevis kiwktaim long kisim ol widro aplikesen long taim ol memba i putim aplikesen i go insait inap long taim ol i kisim pei aut bilong ol. Long dispela as, ol widro aplikesen bilong ol narapela ejen em Fan i no inap long givim tok orait long ol long wanpela taim.

Husat man o meri i wok long mekim dispela kain pasin long kisim fi o Mani long ol memba bilong Nambawan Super em bai mipela i givim nem bilong em i go long polis.

Sapos yu laikim sampela halivim, plis ringim Kol Senta bilong mipela long telefon namba: 309 5311 o 7333 7777 o 76112222 o salim email long CallCentre@nambawansuper.com.pg

**Tok orait i kam long Garry Tunstall,
Sif Eksektiv Opisa**

Gavman bai sekim mani kam we

SIF Seketeri Isaac Lupari i tok gavman bai mekim wanpela wok painimaut i go insait long sekim na holim husat man i wok long givim mani na sapotim ol sumatin bilong UPNG long kisim kar na baim balus tiket long ran i go long ol arapela insait long kantri.

Mista Lupari i tok sampela ol ausait man i wok long sapotim ol sumatin lida long UPNG, bikos pasin bilong ol lida bilong sumatin long kisim kar na kisim balus long raun em i soim ples klia olsem sampela man meri i wok long hait na sapotim ol long baksait.

Em i tok gavman i bilip strong olsem ol sampela ausait man i wok long sapotim ol sumatin, na ol i wok long givim mani na ol arapela sapot long helpim ol i mekim protes egensim gavman.

Vais-Sensela bilong UPNG, Profesa Albert Mellam, i tok UPNG administresin i stopim mani em i save givim long SRC, na em i no

save ol sumatin lida i kisim mani long we na haiarim ol kar na baim balus tiket long raun i go long ol arapela senta na taun insait long kantri.

“Ol sumatin i kisim mani long we na holim ol haia kar na kalap long balus olsem teksil bilong ol. Sampela manmeri i stap baksait long ol na i wok long bagarapim bihain taim bilong ol sumatin, na i wok long tokim ol long protes egensim gavman.

“Mipela bai painimaut husat tru ol dispela manmeri. Ol i wok long bagarapim edukesen bilong ol sumatin long UPNG.

“Dispela ol manmeri i mekim na ol sumatin i stap long hevi. Gavman bai mekim wanpela wok painimaut, na dispela bai sekim na holim ol manmeri husat i stap baksait long ol yuni sumatin,” Mista Lupari i tok.

Long Tunde dispela wik, SRC Presiden Kenneth Rapa i tok ol i no gat wanpela samting long haitim long ai bilong Mista Lupari o long

Praim Minista Peter O’Neill. Mista Rapa i tok em i no save long wanem kain toktok Mista Lupari i wok long mekim. “No gat wanpela man o meri i wok long sapotim mipela. Mipela ol sumatin i sanap long mekim dispela pait long gutpela bilong kantri. “Mipela i kisim liklik sapot

long ol provinsal grup bilong mipela. Mi i bin sanap long pait long wanem samting em rait, na mipela i yusim risos bilong mipela yet,” Mista Rapa i tok. Em i tok UPNG administresin i pasim pinis mani SRC i save kisim long ranim opere-sen bilong en.



Kenneth Rapa



Isaac Lupari



PABLIK NOTIS

TAMBU LONG RANIM “HI LO LOTERI”

Dispela toksave i go aut long olgeta pablik olsem pasin bilong pilai laki loteri ol i save kolim long **“Hi/Lo”** em i no bihainim lo, na lo i bin tokaut long dispela long de 14 bilong mun Februeri 2008 insait long **Nesanel Gaset Notis G22** na Nesanel Geming Kontrol Bod i wanbel olsem notis bilong gaset em i trupela aninit long *Seksen 5(3) bilong Geming Kontrol Ekt 2007*.

Bod i save long ol wan wan man na meri husat i wok long yusim ol Interim Oda bilong 18 Epril 2008 long ranawe long loa i holim pasim ol na kotim ol long ol i ranim yet ol gem bilong Hi/Lo. Tasol, dispela em bilong tok save long olgeta pablik olsem Interim Oda bilong 18 Epril 2008 em Waigani Nesanel Kot i bin rausim pinis long 19 Me 2008. Long wankain taim mipela i bin kisim tok save olsem i gat wan wan man na meri husat i bin raitim pepa notis na givim aut tok orait bilong ranim yet Hi/Lo gem.

Aninit long *Geming Kontrol Ekt 2007* Nesanel Geming Kontrol Bod em i **wanpela Gavman Bodi tasol we i gat pawa long kamapim lo na givim laisens bilong olgeta kain pasin bilong loteri gem aninit long lo bilong ol Loteri gem. Olsem na i no gat wanpela narapela Gavman Bodi long Nesanel na Provinsal level we i gat pawa long mekim dispela.**

Ol dispela wan wan man na meri i no gat rispek long lo bilong dispela kantri. Sapos mipela i painimaut long wanpela man o meri husat i wok long helpim ol lain long wokim pasin bilong laki we i brukim lo o em yet i wok long ranim loteri gem Hi/Lo, kot bai sasim em long baim kot fi long K5 000 o go long kalabus inap long 12-pela mun o tupela kain mekim save wantaim.

Long dispela as, mi laik singaut long olgeta lain husat i wok long ranim ol hait laki loteri bisnis bilong Hi/Lo long stopim na rausim olgeta Hi/Lo masin.

Sapos ol pablik manmeri i gat save long dispela kain pasin bilong pilai loteri i stap, plis toksave long opis bilong mipela long telepon namba 320 1907 o long feks namba 320 1908. Mipela bai haitim olgeta toksave bilong yu na i no inap tokaut long narapela.

Tok Orait i kam long:
Imelda Agon
Sif Ekseketiv Opisa.

PNA pis i winim bikpela mani

Caroline Tiriman i raitim

OL memba kantri bilong Parties to the Nauru Agreement (PNA) nau i save kisim bikpela mani olsem \$450milien US Dola long ol pis bilong ol.

Sif Eksekutiv Opisa (CEO) bilong PNA, Dokta Transform Aqorau bilong Solomon Ailan i tok ol memba kantri bilong PNA nau i save amamas tru long kisim bikpela mani long ol pis bilong ol, winim taim ol i bin statim dispela wokbung bilong ol we i save winim \$450milien US Dola.

Despla em toktok bilong Dokta Aqorau husat klostu nau bai lusim wok bilong en.

Ol memba kantri bilong PNA em Federated States ov Maikronesia, Kiribati, Masal Ailan, Nauru, Palau, Papua New Guinea, Solomon Ailan, Tokelau na Tuvalu.

Dokta Aqorau i tok wan wan long ol dispela kantri i bin save kisim \$50 milien US dola, tasol nau ol i save kisim \$450milien US Dola long wan wan yia.



Ol pis long bris long Koror, biktaun bilong Palau. Foto: ABC

Edukesen em i ki bilong kantri

Frieda Sila Kana i raitim

“Edukesen i mas kamapim senis insait long olgeta wan wan distrik na olgeta hap kona bilong kantri,” Ekting Seketeri bilong Edukesen, Dokta Uke Kombra i tok.

Dokta Kombra i mekim dispela toktok long taim Edukesen Dipatmen i opim nupela Taim In Attendance masin long Pot Mosbi, long stat bilong dispela mun.

Tingting bilong dispela gavman em long lukim olsem; olgeta wan wan pikinini i mas kisim edukesen, na tu ol i mas kisim kain edukesen sistem we i gat gupela kwaliti wankain olsem edukesen long ol narapela hap bilong wol.

Tasol dispela driman bai kamap sapos mipela i mekim senis long level bilong ol skul stret. Mipela i wokim sampela rifom o senis long edukesen pinis olsem long senisim karikalam long Autkam Bes Edukesen (OBE) i go long Standet Bes Edukesen (SBE) we nau mipela i wok long bihainim stap.

Mipela i traिम long mekim senis tu long wei bilong wokim ol tes we i gat bilip long en, we sistem i stret long olgeta pikinini i mas go long



Sampela Opisa bilong edukesen dipatmen, tisa sevis komisen na tisa asosiesen wantaim ol narapela senia opisa bilong edukesen i stap long lukim Time In Attendance masin long Nesenel Palamen Stet Fanksen rum. Poto: Frieda Sila Kana.

ol bikpela skul na long ol narapela hai institusen.

Mipela i traिम mekim senis tu long ol tisa koles we olgeta tisa i mas pinisim gret 12 bihain long ol i ken go insait long tisa koles.

Sampela edukesen risets mipela

i gat em i soim klia olsem ol tisa em i wanpela bikpela as bilong lainim samting. olsem na taim yu no gat rait tisa insait long klasrum long lainim ol pikinini, em bai bagarapim save bilong ol.

Olsem na dispela senis bilong

sistem bilong holim rekot bilong tisa i stap long skul em i samting we bai helpim olgeta wok bilong rifom o insait long edukesen sistem long kamap gut.

Dokta Kombra i bin strongim tok bilong Minista bilong Pablik Sevis, Sir Puka Temu olsem ‘edukesen emi ki’.

“Sir Puka Temu, toktok mekim em i stret, na yu no abrus long taim yu tok olsem olsem Edukesen em i ki bilong kantri. Edukesen em i ki bilong kantri i kamap gut long bihain taim,” Seketeri bilong Kombra i tok.

Dokta Kombra i tok dispela projek i bin kamap olsem wanpela bung projek insait long edukesen sistem wantaim Minista bilong Edukesen, Tisa Sevis Komisen, Dipatmen bilong Edukesen na PNG Tisa Asosiesen olgeta i wanbel long dispela wok i mas kamap.

Ekting Seketeri tok, tupela salens edukesen dipatmen i gat long wok bilong dispela sistem em; sapos ol hetmasta o prinsipel bi-

long skul na ol distrik standet opisa bai mekim trupela wok long lukim ol tisa i yusim gut dispela sistem o nogat, na tu em salens bilong transpot sistem long kisim ol dispela taim masin i go long ol skul we i stap long olgeta hap bilong kantri.

“Nau mipela i mas lukim ol 110 skul long NCD wokman na wokmeri, olgeta haikul na sekenderi skul long ol 4-pela provins we mipela i givim nem pinis.

“Mipela bai putim dispela ol masin long 400 skul tasol mipela i laik makim pastaim ol sekenderi na nesenel institusen pastaim na bihain bai mipela i go daun long ol praimer skul na ating bihain trupela bai mipela i go long ol elementri skul,” Dokta Kombra i tok.

Ekting Seketeri Kombra i tok tenkyu long minista bilong Pablik Sevis, Sir Puka Temu na tu em i mekim luksave long tupela provin-sal gavana bilong Wes Nu Briten, Moroba na ol narapela memba bilong Palamen na ol minista husat i bin kamap long lukim dispela nupela teknoloji bilong menesmen i kamap.

Word Publishing Company Limited

P. O. Box 1982, Boroko, NCD, PNG. Tel: (675) 325 2500 Fax: (675) 325 2579

Email: word@wantokniuspepa.com

NOTICE OF ANNUAL GENERAL BUSINESS MEETING

Notice is hereby given that the Annual General Business Meeting of Shareholders of Word Publishing Company Limited will be held at the company office at the DOVE TRAVEL Premises, Level 2, Section 24 Lot 25, Angau Drive (CNR LAHARA AVENUE), BOROKO, NCD, Papua New Guinea on Friday 17th June 2016, commencing at 9:00am.

ORDINARY BUSINESS

1. Financial Statements

To receive and consider the Financial Statements; and the reports of the Directors and Auditors for the period ended 31 December 2015.

2. Directors

Election of Directors:

Rev Bernard Siai retires by rotation in accordance with the Company's Constitution and being eligible, offers himself for re-election.

Fr Paul Liwun, SVD retires by rotation in accordance with the Company's Constitution and being eligible, offers himself for re-election.

Following is the current list of directors and when their terms end;

Bishop Francesco Sarego, SVD term ends 2017

Rev Bernard Siai term ends 2016 alternate, Mr Uvenama Rova

Fr Paul Liwun SVD term ends 2016

Rev Sommy Setu term ends 2018

Mr Lawrence Stephens term ends 2017

Fr Denny Guka term ends 2018 alternate, Mr Amos Misirait

Fr Janusz Skotniczny, SVD term ends 2018

Fr Joseph Maciolek, SVD term ends 2017

3. Appointment of Auditors

Kapi & Clarke Chartered Accounts, the auditors for the past year, being eligible; offer themselves for re-appointment as auditors of the Company.

4. Any other business of which notice is given.

Dated this 2nd Day June 2016

By Order of the Board.

Publishers of:



Wantok
Niuspepa Bilong Yumi Ol PNG Stret!!

Wantok Today



1



2

1 - 2: Ol gaden kaikai i stap long hip long wan wan wokman na meri bai kisim. Ol kaikai bilong stua tu i kam wantaim ol basket.

Poto: Dennis Orere – UCPNG Asembli opis

3: Ol meri lida bilong Yunaitet Sios PNG, Is Sentral Papua Rijon i amamas long givim kaikai long ol wokman bilongsios Asembli opis.



3

UCPNG Meri givim ofa long Asembli opis

Denis Orere i raitim

OL meri felosip bilong Yunaitet Sios bilong Is Sentral Papua Rijon i soim pasin bilong wok bung wantaim insait long wok misin bilong God las wik taim ol i bin bringim ol kaikai long ol wokman na wokmeri bilong Asembli Opis bilong sios long Pot Mosbi.

Yunaitet Sios long Papua Niugini Is Sentral Papua Rijon em i

karamapim ol hap bilong Rigo i go long Abau long Sentral Provins. Ol meri felosip lida bilong dispela rijon i bin bringim kain kain presen na kaikai long givim olsem ofa bilong wanbel na wok wantaim long ol wokman na wokmeri insait long Asembli opis.

Marama Winnie Renagi, meri bilong olpela Is Sentral Papua Rijon Bisop, Reveren Laka Renagi, i tok long taim bi-

long seremoni las wik Fraide olsem dispela kain pasin em i namba wan insait long wok bilong God, na em i tok kain pasin i mas kamap yet long bihain taim tu.

Ol i bin holim wanpela seremoni insait long Sista Fairhall Memorial haus lotu long Gordons. Marama Renagi i tok dispela kain pasin em ol lida bilong sios i mas mekim long strongim wok bilong God.

Ol meri i bin wokim wankain samting long yia i go pinis, tasol dispela yia em i bikpela moa we ol i bringim moa kaikai. Ol i bringim ol stua kaikai tu wantaim ol gaden kaikai.

“Em i wanpela gutpela de bilong givim ol kaikai, kamapim pren na felosip na soim tingting bilong sios long mekim pasin bilong yuniti insait long Ministi bilong God,” Marama Winnie Renagi i tok.

Bogenvil selebretim 11 eniveseri

ATONOMAS Rijon bilong Bogenvil (ARoB) i lukim namba 11 yia bilong em i ranim gavman bilong em yet, long asde Trinde, Jun 15.

Bikpela selebresen bilong dispela de i kamap long Hutjena, long Not Bogenvil we ol opisa bilong ARoB Asembli na edministresen i bin holim, tasol olgeta wan wan konstituensi tu i wokim wan wan selebresen bilong ol yet long tingim dispela de Jun 15 taim Bogenvil i kamap atonomas gavman long yia 2005.

Sif Seketeri bilong ARoB, Paul Kebori i bin tok olsem long dispela taim bilong selebresen ol bai wokim awenes bilong nupela referendum we bai kamap long Jun 15, 2019.

Bogenvil gavmani bin putim K400,000 long holim dispela wanpela de selebresen long tingim dispela de.

Long Pot Mosbi, ol Bogenvil Pot Mosbi Asosiesen (PBA) bai holim selebresen bilong Bogenvil de long dispela Sarere 18 Jun, long Saut Pasifik At Festival eria long Waigani.



Ol mama bilong Atonomes Rijon bilong Bogenvil i selebret. Fail poto

Bikpela toktok bilong selebresen em ‘Together we can’o ‘ Yumi ol-

geta wantaim i ken mekim kamap’ long strongim olgeta lain long stap

insait na wok wantaim long mekim wok.

PBA i wok long ol rijon olsem na ol i makim wan wan lain long makim 4-pela rijon olsem Atols, Not Bogenvil, Sentral na Saut Bogenvil.

Edita bilong *Wantok Niuspepa*, *Veronica Hatutasi* tu bai stap mekim sampela toktok olsem wanpela meri Bogenvil long wanem kain we bai ol i ken bringim ol Bogenvil pipel wantaim aninit long dispela tingting ‘Yumi olgeta wantaim i ken mekim samting.’

Misis Hatutasi i bin raitim wanpela buk pinis long wanem kain samting em i bin lukim long taim em i bin stap long kraisis o hevi namel long ol Bogenvil Revolusen Ami na ol PNG Difens Fos na hevi we ol liklik man, meri na pikinini na ol bisnis i bin bungim long dispela taim. Dispela buk tu bai i stap bilong salim, long Sarere.

Bai i gat ol singsing stail bilong Bogenvil yet na tu ol kain kain stail kaikai na ol narapela samting olsem ol buk na ol teknoloji we bai ol Bogenvil sitisen yet bai putim aut long ol wan wan liklik haus bilong ol.

Stori na Wok

wantaim
Elizabeth Cox

Dispela em laspela atikel bilong Elizabeth Cox long pes bilong ol meri.

Wantok i bilip olsem ol toktok we mipela i bin ranim stast yet long stat bilong dispela yia i bin givim sampela gutpela helpim long ol mama long sait bilong wok gaden, nutrisen, helt na kaikai.

Long neks wik, bai yumi statim ol tok skul atikel bilong narapela buk ol i kolim, Save na Mekim.

Skin Bilong Yumi i Bihainim Kaikai Bilong Yumi

TOKSAVE: Yumi olgeta mas klia olsem kaikai em i namba wan samting i bosim strong bilong yumi na skin bilong yumi i stap gutpela na nogat sik i kamap.

Sapos yumi lukluk nabaut bai yumi lukim olsem yumi i gat kain kain man na kain kain skin. Sampela i pat na les long wok. Sampela i namel na i smat. Sampela, tarangu, i bun nating tru na sik i save bagarapim ol. Kaikai em i bikpela as bilong ol dispela samting.

Bipo long Papua Niugini planti manmeri i save stap i orait tasol bikos long pasin tumbuna ol i save planim o painim inap gutpela kaikai tasol nau laip i senis na planti man bilong graun i painim hat long planim kaikai. Long sampela hap, bus na graun i sot nau long ol man. Long planti ples ol i ronawe i go long taun, painim wok, na ol meri tasol i stap na hat long wokim gaden na painim kaikai bilong ol pikinini.

Planti long ol i go long taun ol i no painim wok. Ol i stap nating wantaim ol wantok long hap bilong 'skwata.' Long dispela hap i no gat bus bilong wokim gaden na i no gat bus bilong painim kaikai. Ol i mas baim kaikai sapos ol i gat liklik mani. Tasol bai ol i no inap baim gutpela kaikai. Mani bilong inap long ol basket, loliwara liklik rais samting. Dispela kaikai em i no inap. Sapos manmeri i traim na stap tasol long dispela kain kaikai, bai ol i painim bagarap.

I gat sampela man i stap long taun na ol i holim bikpela wok na ol i kisim mani inap long baim kaikai.

Tasol planti long ol i no klia tumas long "nutrisen" o we bilong lukautim bodi long kaikai. Sampela ol i harim ol gris bilong planti switpela o gris kaikai. Sampela ol i strong long rais na tinpis bikos ol i les long kuk long gaden kaikai bilong maket. Planti man i tromoi mani long dring moa bia. Long kain lain olsem bai yu lukim papa mama i pat tumas long planti gris kaikai, na sampela taim pikinini i bun nating na sot long blut bikos em i sot long ol kumu na bin. Planti taim bai yu lukim olsem ol dispela pikinini bilong taun, tit bilong ol i bagarap pinis long kaikai i gat planti suga tumas.

Ol Meri Inap Long Mekim Wanem?

Ol meri i mas klia olsem yumi, na famili bilong yumi, bai stap gut na strong na nogat sik sapos ol i kaikai inap gutpela kaikai. Nambawan kaikai long Papua Niugini em ol gaden kaikai yumi yet inap long kamapim. Wan wan stua kaikai i orait: olsem kiau, na susu bilong kau o abus. Tasol dispela kaikai i bikpela mani tru! Planti kaikai bilong stua i rabis, na i giaman grisim yumi long lusim gutpela kaikai. Planti ol i suga na plaua tasol na nogat nutrisen long en. Sapos yumi pulimapim bel bilong pikinini long dispela kain kaikai, bai ol i painim bagarap long tit na sik bun nating.

Ol mama mas klia gut tru. Yumi mas painim bikpela strong long gaden kaikai sapos yumi laikim famili i stap gut. Sapos yumi no inap long planim planti kaikai, na yumi mas baim kaikai orait go lng maket na painim gutpela kaikai. Noken harim gris bilong ol stua kaikai na tromoi bikpela mani long ol kaikai i nogat samting long helpim bodi. Na tu em samting bilong ol bisnis o kampani bilong narapela kantri.

Harim na save na tingting gut, skin bilong yumi i bihainim tru wanem kain kaikai yumi kaikai. Kaikai gut na bai bodi na skin i kamap gutpela tu.

Bikpela 90 bonde selebresen bilong Kwin

BIKPELA selebresen i bin kamap long las Sarere Jun 11 long Buckingham Pales long Ingran long makim 90 bonde bilong Kwin Elizabeth 2 bilong Ingran na Komonwel.

Gavana Jenerel na Sif, Sir Michale Ogio wantaim Ledi Esmie i bin makim PNG long dispela bikpela selebresen we ol het bilong ol kantri long Komonwel na wol i bin stap long en.

Planti tausen pipel i bin pulumapim mal em rot lomng go insait long Pales, long tok tenkyu i go long Kwin Elizabeth long gutpela lidasip bilong em long moa long 60 yia, longpela taim stret i winim lidasip long ol arapela taim i kami nap nau, na tok hepi bonde long en.

Mak bilong 10,000 ges i no bin wari long ren long stap insait long "giant" pati long fran bilong Buckingham Pales long las sande long selebretim opisel bonde bilong Kwin.

Tumbuna bilong Kwin em Peter Philips i bin ogenaiseim dispela bikpela lans olsem fainel iven long wanpela wik selebresen we i bin gat sios sevis long Sen Paul's Katitrel na tredisenel kala paret bilong ol soldia wantaim yunifom bilong ol.

Kwin i bin tok tenkyu i go long ol planti tausen pipel long sapot bilong ol na wokim ol toktok long tok tenkyu i go long ol lain i biun



Kwin (namel) man bilong em Prins Philip long hansut na wanpela liklik gren bubu bilong em long han sut wantaim papa bilong em na bubu man, Prins William.

makim ol planti sariti we Kwin i save kamap olsem petron long ol.

"Mi tok tenkyu long ol gutpela betde mesej kad mi kisim," Kwin Elizabeth 2 i bin tok.

Bonde stret bilong Kwin em long mum Epril tasol bihainim tumbuna pasin bilong bipo, ol i save holim selenresen long taim bilong sama o taim bilong san long mun Jun.

Sotpela histori em Prins Elizabeth i bin kamap kwin long 1952, taim em i gat 25 krismas, bihain long papa bilong em, King George 6 i bin dai.

Ol i bin holim bikpela sere- moni long makim em Kwin na het bilong Ingran na



Kwin Elizabeth nau

Ol foto: Intanet

Kwin na man bilong em i ron long kar na tromoi han long ol ges.



Komonwel long Jun 1953.

Long 1977, em bin selebretim silvsa jubili o 25 yia, daimon jubili long 2012, winim ol narapela famili na tumbuna long stap olsem hetman o meri longpela taim stret.

Kwin i bin stap Prinses yet taim em i maritim Prins Philip bilong Greece na Denmark long Novemba 1947.

Ol i gat 4-pela pikinini em Charles, Anne, Andrew na

Edward. Ol i gat 9-pela bubu, Peter na Zara Phillips (b.1977 na 1981); Duke ov Cambridge na Prince Harry (b.1982 na 1984);

Prinses Beatrice ov York na Prinses Eugenie ov York (b.1988 na 1990); na Ledi Louise Windsor na James, Viscount Severn (b.2003 na 2007). Kwin na Prins Philip i kamap ol gret gren bubu long Savannah Phillips, we mama i karim long Desemba 2010.

Maski disebol, edukesen i helpim Manoka long inapim ol driman

...Winim skolasip long skul long Australia

TINGTING bilong planti pipel em sapos ol i gat samting i no stret long bodi bilong ol o ol i disebel, laip bilong ol i stop long hap na ol i no gat sans long laip long go hetim na i gat gutpela laip, no gat skul, no gat wok, na bai stap disebel tasol long han na lukaut bilong ol family bilong ol.

Tasol wanpela meri husat i no larim disabiliti o samting i rong long bodi bilong em i stopim em long inapim driman bilong em.

Nem bilong dispela meri em Manoga Igo bilong Sentrel Provins.

Em i wok wantaim Cheshire Disability Service

long Pot Mosbi. Bipo ol i save kolim dispela ogenaisesen Cheshire Homes we ol i save lukautim na givim ol gutpela laining o skul samting long sait bilong ikononik na sosel i go long ol disebel pipel.

Manoka i marit nas em i gat tupela pikinini.

Mama i karim em na em i bin gutpela pikinini tasol taim em i gat 4-pela krismas, hap bodi long lowa hip i bin paralais o i dai na i kami nap nau, em i no nap wokabout. Em i save sindaun long wilsia na mekim wok.

Hevi long i no inap wokabout i no stopim em long stap olsem nomol meri, no gat.

Nau Manoka i wanpwela long ol i winim Australia Awod skolasip nae m bai go long Australia na wokim stadi long Diplomas long Komyuniti Sevis.

Maski long hap bodi bilong em i dai, em i strongim em yet na i go long skul. Em i bin statim skul laip long Hagara Pramer, Sen Michael's Hanuabada, Kwikila Hai skul, taiping skul long Salvesen Ami na bihain, wok wantaim Gel Gaid Asosiesen olsem wanpela taipis.

Taim em i wok long hap, em i bin bungim man bilong em na tupela i bin marit na statim famili.

Man bilong em tu i gat dis-

abiliti bikos em ai no gut na em i no inap lukluk gut.

Em i wok long planti krismas long Cheshire Disability service nan au em i kamap Asisten Menesa.

Manoka i tok bihain long pinisim skul long Australia, em bnai kam bek na helpim ogenaisesen i kamapim gut ol sevis bilong em long siti, taun na ol rurel eria.

Strongpela toktok we Manoka i laik mekim long ol narapela disebel pipel em, edukesen em i ki o bikpela smarting we bai opim dua long ol sans insait long laip.

Olsem na tingting na lukluk long strongim sait bilong yu na bai ol i gat namba tu na gutpela sans long laip.

Rurel helt senta kirap long Yasubi

Loutoba Siapea i raitim


ESIEN Developmen Benk (ADB) i wok patna wantaim Isten Hailans Provinsel Helt Atoriti (EHPHA) long givim bikpela mani long kirapim ol rurel helt senta na haus sik long Isten Hailans.

Wanpela bilong ol dispela helt senta we i kisim pinis helpim i kam long ADB em, Yasubi Rurel Helt Senta insait long Okapa distrik. ADB i givim mani mak long K5 milien i kam long ADB long pinisim olgeta wok. Dispela em i wanpela liklik hap bilong K20 milien we ADB i redi long helpim EHPHA long kirapim 4-pela helt senta. Wanpela long Okapa distrik na tripela long Kainantu distrik.

Ekting Sif Eksekutiv Opisa bilong EHPHA, Joshua Soso husat i tok, long lukluk bilong atoriti, dispela helt senta bai givim bikpela helt sevis i go long ol siklain na ol pipel bilong Okapa. Dispela em bikos, rurel haus sik we i stap long Okapa stesin em i olpela tru, na planti ol samting long dispela haus sik em ol i no inap yusim bikos ol i bagarap.

Standet bilong wara saplai, ol toilet, rum was was, ol bet na haus kuk long dispela haus sik i bagarap na em i nidim tru ol nupela samting long em i ken givim sevis i go long ol pipel bilong Okapa. Tasol helpim bai i kam long we?

Wantok Nius i bin mekim lukluk raun wantaim ol senia opisa bilong EHPHA na luksave olsem i no long taim Okapa rurel haus



Bilding na konstraksen wok i go het nau long Yasubi long rurel Okapa distrik.



Ekting CEO bilong Isten Hailans Provinsel Helt Atoriti, Joshua Soso, na ol senia opisa bilong em i lukluk raun wantaim ol divelopa patna long Yasubi helt senta long Okapa distrik, Isten Hailans.

Ol poto Loutova Siapea.

sik bai stopim wok bilong em, bikos i no gat helpim i kam long opis bilong lokol memba na ol arapela stekholda long provinsal na nesanel level.

Olsem na taim ADB i lukluk long kirapim helt senta projek long Yasubi, EHPHA i bin wanbel na ADB i givim ful sapot wantaim ol mani. Olsem na

nau yet, wok konstraksen bilong projek bilong Yasubi helt senta em i go het nau na i kam klostu long pinis bilong em.

Tripela narapela ples we EHPHA i makim long kirapim ol helt senta wantaim helpim bilong ADB mani em, Amaira, Japa na Krufi long Kainantu distrik. Tasol ol pepa wok i no redi

bikos i gat sampela hevi i kamap namel long ol papa na mama graun olsem na wok bai i no inap kirap yet.

Na taim Amaira, Japa na Krufi i wok long skelim toktok yet, Yasubi i wanbel long kisim projek olsem na bilding wok em i go het nau long Yasubi helt senta.

Pait bilong daunim sik TB i go het yet

WOK bilong Yut Wantaim Misin (YWAM) long Oro Provins i helpim 4,414 pipel long ol sik ol i gat, insait long wanpela 11-pela de autris wok bilong ol long provins long dispela mun.

Long taim YWAM helt ke tim i raun long provins, ol i bungim wanpela liklik bebi, nem bi long em i Ruth. Ol i lukim olsem em bun nating stret na pes bilong em i drai olgeta taim em i slip long lek bilong mama bilong em na em i hatwok long pulim win. Taim ol i wokim tes long laboratori bilong medikal sip ol i painim olsem liklik Ruth i gat sik TB.

Sik TB em i stap olsem wanpela namba wan sik insait long Papua Niugini na namba bilong olpipel i kisim dispela sik i winim namba bilong olgeta narapela kantri long Pasifik rijon.

Nesanel gavman i tok em bai sapotim wok bilong daunim sik TB long Papua Niugini inap long ya 2050. Ol provinsal gavman wantaim ol lain husat i save helpim long bringim gutpela helt na ol NGO olgeta i wanbel wantaim dispela visen na olgeta i wok yet long mekim dispela tok promis i kamap tru.

MV YWAM PNG nau i kamapim pinis wanpela laboratori antap long sip long painim aut long ol sik TB klostu long ol pipel long rurel eria.

YWAM Medikal Sip Risets Sientis, April Harper, i tok olsem long tupela wik ol i bin stap autris long Oro Provins, ol i bin testim 64 pipel long sekim sik TB na ol i painim aut olsem 49 bilong dispela lain i gat sik TB.

“Wok bilong mipela i kamap gut bikos Oro Provinsal Disis Kontrol Opisa, Gibson Kungkene, i stap insait long tim bilong mipela. Bihain tasol long mipela i givim em ol ripot bilong wok painimaut bilong mipela, em i mekim rot bilong ol tritmen na wok bilong sekap long ol wan wan siklain,” Mis Harper i tok.

“Wanpela hevi mipela i lukim em olsem ol lain i painim sik TB i no save go long ol klinik o haus sik inap ol i sik nogut tru. Taim ol i kamap long kisim marasin em bodi bilong ol i bagarap pinis na marasin tu i no inap long helpim,” Mis Harper i tok.

“Wantaim helpim bilong YWAM long sekim sik TB hariap na givim ol marasin long stopim, Patnasip wantaim YWAM i helpim mipela long lukim nupela wei bilong mekim wok. Em i givim mi nupela strong long pait yet long helpim ol pipel bilong Oro Provins,” Mista Kengkeke i tok.

Isi isi pait bilong daunim sik TB i go het, long helpim liklik Ruth wantaim famili bilong em na ol helt wokman na meri i wok long helpim long lukautim em.



Oro Provinsal Disis Kontrol Opisa, Gibson Kungkene i lukluk long ol binatang insait long makroskop bilong leboretori antap long MV YWAM PNG. *Poto: YWAM Medikal Sip midia.*

Goroka maket i no wari long sik taipoid

Loutoba Siapea i raitim

OL bikman bilong helt long Isten Hailans i wari long lukim olsem ol pipel i no tingim helt bilong ol pablik long taim ol i wok long salim ol kuk kaikai olsem lem fleps, sosis, skon na ol arapela kaikai ausait long bikpela Goroka maket, Isten Hailans provins.

Joio Quinn husat emi wanpela Helt Ekstensen Opisa (HEO) long Goroka Provinsel Haus sik i bin mekim sampela strongpela toktok long wanpela ripot presentesen bung bilong ol helt woka we i bin kamap long Goroka yet long Mande wik i go pinis.

“Helt bilong ol man, meri na pikinini long ol pablik ples em i bikpela samting, long wanem, helt em i wok bilong yumi olgeta wawan. Tasol yumi i no save kisim gutpela tingting long was gut long helt sait bilong laip bilong yumi. Long dispela as planti ol pipel bilong yumi



Tupela marit i salim ol sosis na ban ausait long bikpela Goroka taun maket long Isten Hailans.

Poto: Loutova Siapea.

long olgeta level bilong laip i wok long lusim laip bilong ol nating nating long ol sik olsem taipoid, dairia o pekpek wara, TB, daiaibitis na ol kain laip stail disis olem.”

Em i tok, insait long wok bilong em olsem wanpela helt woka, em i lukim pinis planti man, meri na pikinini i lusim laip bilong ol long sik taipoid.

“Sik taipoid em i no gutpela

sik, na ples we dispela kain sik i ken kamap bikpela hariap tru i go i kam, em long ol kain pablik ples olsem bikpela Goroka maket we ol i save kukim mit o lem fleps, sosis, skon na ol arapela kaikai na salim openli long ol man,meri na pikinini”, Quinn i tok.

Em i tok, nau yet em i wok long stretim gut ol ripot we em bai bringim i go long ol atoriti long antap level, Goroka Taun atoriti na Gahuku Rurel LLG husat i go pas long lukautim Goroka maket i mekim samting nau long pasim na stopim olgeta pasin bilong kukim ol kaikai na salim long Goroka maket bipo long planti moa laip bai lus.

Quinn i tok em i gat bikpela wari tru, long wanem, sapos ol atoriti i no nap long stopim dispela pasin bilong kukim kaikai na salim long ol pablik ples olsem long Goroka maket, planti manmeri na pikinini bai kisim sik taipoid na dai yet.



Rot bilong pasim, haitim na stilim mani i kamapim bikpela hevi long kantri

PNG em i wanpela liklik ailan kantri long wol i pulap wantaim blesing bilong God Papa. Ol arapela kantri long wol, ol i no save PNG i stap we, tasol blesing bilong God tasol i save kantri bilong yumi i gat nem long ol kain kain ol gutpela ol samting God i putim long kamapim mani.

Olgeta yia yumi salim ol dispela risos i go aut na bek bilong en yumi save kisim bilien kina i kam insait long paus bilong gavman bilong yumi long mekim wok developmen long dispela kantri. Tasol, pasin bilong pasim, haitim na pasin stilim i kamap namba wan long ol memba na ol wokmanmeri bilong dispela kantri na sevis bai yumi kisim olsem wanem.

Nau pasin stil i pairap long PNG na wol i harim pinis na ol dona kantri i les pinis long helpim yumi. Lukim, no gat hat wok bilong ol. Karim brif kes raun tasol na kamap miliena long nait tasol.

Tru, pasin bilong kisim samting yumi mas wok hat, swet i mas kamap long pes bilong yumi na blut i mas kapsait pastaim. Long dispela rot bai yumi lukim kaikai long hatwok yumi mekim.

Tru i gat liklik namba bilong ol manmeri bai yumi lukim hatwok tasol na ol i lukim kaikai, tasol ol les lain, ol i no hatwok na kamap nait miliena em ol memba na ol wok manmeri bilong gavman.

Sem bilong yumi PNG. Yumi ol memba na ol bosman bilong gavman institusen. Wai ova nait miliena? Tru, tumas pasin bilong karim brif kes tasol na kamap ova nait miliena, plis lusim

pasin stil na lusim pasin bilong haitim mani. Larim blesing bilong God mas i stap ples klia long ai bilong ol manmeri na sindaun bilong yumi bai go stret.

Yumi traim na glasim Buk Stat 2, i stori long gaden Iden. God i kamapim kain kain gutpela ol samting na putim Adam long lukautim, na bikpela samting em diwai bilong givim laip. Dispela em i gat bikpela velu o mak na em tambuim man long no ken go klostu long en. Tasol, man i abrusim tok bilong God na em i stil.

Long sapta 3.14 – 19 Papa God i mekim strongpela tok long man, meri na snek. Long snek, hevi em i karim i winim hevi bilong arapela animal na wokabaut long bel bilong em na laip taim bilong em, em i mas kaikai das bilong graun.

Long meri, em bilong karim pikinini, pen bilong en, em mak bilong indai. Na long man, em hatwok, swet i mas kamap na katim skin na blut i mas kapsait pastaim na kaikai bai kamap.

Long stil pasin tasol, God i putim kes long graun. Ol rop i gat nil na ol gras nogut bai kamap na karamapim gaden bilong yu. Na bai yu wok hat tru long kisim kaikai bilong yu na tuhat bai i kamap long pes bilong yu na bai yu hatwok oltaim.

Tru, tumas, hatwok, yumi bai lukim senis, tasol pasin stil yumi wok long lukim bikpela ol MAK nogut i kamap pinis. Kos bilong dispela hevi em ol gras nogut yumi yet yumi putim ol long opis na yumi mas was gut nau long 2017 na widim dispela gras nogut i go aut.

Pasin bilong pasim, haitim na stilim em inap nau. Havestim gaden bilong God long PNG, honas na yusim long trupela rot na mitim nid bilong yumi pipel. Gaden, Diwai bilong givim laip, snek, meri na man.

Gaden bilong yumi PNG, Papa God i putim na blesim, ol mak bilong ol risos bilong yumi save kamapim mani mak, i winim ol narapela kantri long wol olsem Iden, tasol satan i kamap namba wan na winim ol manmeri long haus palamen na ol gavman institusen insait long kantri na paulim olgeta gutpela kaikai God i planim long PNG. Stil, stil, stil na inap long stil.

Stetmen bilong ol Katolik Bisop long UPNG hevi

APIL o askim i go long Palamen long edresim kwik korapesen insait long kantri.

Ol Katolik bisop bilong PNG i mekim dispela tok-tok insait long wanpela stetmen bihain long ol trabel namel long ol yunivesiti sumatin na ol polis long NCD i bin kamap long las wik Trinde.

Trinde las wik i bin wanpela nogut de stret bikos ol Yunivesiti ov PNG (UPNG) sumatin i bin laik mas gut i go long Palamen long givim petisen bilong ol, tasol ol polis i go insait long kempas na sut i go long ol sumatin. Na ol i kamapim bikpela bagarap long 4-pela na planti moa long mak bilong 23 i bin kisim bagarap. No gat man i bin dai.

Jenerel Seketeri long Katolik Bisop Konpres (CBC), Pater Victor Roche SVD i makim maus bilong ol bisop na i tok ol bisop i wari long ol samting i sut long politik insait long dispela kantri.

“Mipela i askim gen Palamen long edresim korap pasin insait long dis-



Pater Victor Roche SVD

pela kantri . I luk olsem i no gat strongpela politikal sapot na tu, sampela taim, i luk olsem save i stap tasol ol i abrusim ol toktok o wokim samting long dispela isu we mipela i bilip olsem ol sumatin na planti pipel i gat kros long dispela,” Pater Victor i makim maus bilong ol bisop na i tok.

Em i tok ol hevi na wari long politik i gat ples bilong em long stretim na dispela em long Palamen we Mama Lo i givim stia.

Em i tok olgeta manmeri long PNG i mas bihainim lo na Melanisen wei na no ken belhat hariap long taim bilong hevi, abrusim hevi i go bikpela na kamapim vailens o pait pasin.

“Mipela i askim olgeta lain i stap long hevi long autim ol wari na hevi ol i gat long en, long gutpela pasin na i no long vailen pasin bilong pait.


Moa yet, mipela i apil long ol disiplin fos i gat long en ol polis na ami, long bihainim stretpela pasin na no ken yusim ol gan samting i go long ol lain i no holim gan o ol samting bilong pait wantaim.

“Em i taim long olgeta pati i stretim het bilong ol na i no belkros na kam wantaim, sindaun wantaim wanpela nutrel pati long wok wantaim na stretim dispela hevi aninit long ol stretpela pasin bilong Gutnius, tok tru, jastis na stretpela pasin,” Pater Victor i tok.

Em i tok moa olsem i moabeta long strongim Ombudsmen Komisn, fas trekim Indipenden Komisn bilong Inkwairi egensim Korapsen na pablik sevis, polis na ami i no ken go insait long ol politiks.

“Klinim hariap naip i save katim aut korapsen,” Pater Victor i tok.

Konpermasio de long Kairiru Ailan



L-R: Bruder Bernard Werao SHB Jenerel Supiria, Bisop Jozef Roszynski, SVD na Bruder Andrew Singer SHB long Yiwun ples, Kairiru Ailan.

Bisop Jozef Roszynski, SVD, i raitim

LAS wik, 120 sumatin bilong Saint Xavier Haiskul long Kairiru Ailan insait long Is Sepik provins i bin kisim Sakramen bilong Konpermasio.

Maski skul i kisim hevi long mani i sot long gavman subidi, skul i wok normal tasol.

Olgeta husat i go insait long dispela sakramen em 120 sumatin, i kisim narapela step bilong Kristen laip bilong ol.

Nau wantaim presen bilong Holi Spirit, ol i mas witesim bilip bilong ol long God Triwan long tok na pasin bilong ol.



Bisop Josef Roszynski, SVD i givim blesing long wanpela sumatin husat i kisim Sakramen bilong Konpermasio long St. Xavier Haiskul long Kairiru Ailan. Ol foto: Bisop Josef



PPL MT. HAGEN OPIS BAI PAS

PNG Pawa Ltd i tok sori tru long ol lain kastoma bilong PNG Pawa long Mt. Hagen olsem Mt. Hagen Bisnis Opis bilong en bai pas long sampela taim nau bikos long ol bagarap i kamap long opis we ol trabel man i mekim long taim bilong ol sumatin i pait na bagarapim taun long las wik.

Bikpela bagarap i kamap long opis bilong PNG Pawa taim ol trabel man long strit i brukim opis na stilim ol kompiuta, laptop, printa, ol telepon na ol tebol na sia bilong opis, long taim bilong ol sumatin na ol strit man i bagarapim ples.

PNG Power bai kisim longpela taim liklik long stretim gen opis na baim gen ol samting bilong wok we ol stilman i kisim. Taim ol dispela samting kamap stret, bai PNG Pawa Ltd i toksave gen long pablik long Mt. Hagen.

PNG Pawa Ltd i tok strong againsim dispela pasin ol man nogut i wokim long bagarapim opis bilong en na stilim olgeta masin na ol arapeal ikwipmen bilong wok na em i laik tok sori tru long ol gutpela kastoma bilong en long dispela kain pasin i kamap.

PNG Pawa Koporet Rilesens i salim dispela toksave

I mas gat wanpela independen grup i mekim wok painim aut

BIKPELA wok bilong traिम stre-tim skul bilong ol studen long Yunivesiti bilong PNG (UPNG) i stat nau. Bihain long polis i sutim ol studen las wik Trunde, bikpela tok kros i kamap na ol lain i sutim tok i go kam long gavman, ol polis, ol studen lida, sosel midia na ol autsait lain.

I gutpela olsem no gat wanpela studen i bin dai. Tasol ol 4-pela i bin kisim bikpela bagarap, na planti arapela i kisim bagarap. Planti bilong ol studen bai i stap yet wantaim pret na bai ol i no inap long skul gut. Ol i lukim stret long ai ol polis i sut long ol.

Long pinis bilong las wik, gavman i tokaut olsem bai i gat wanpela wok painim aut i kamap long painim as bilong ol trabel. Em i tok dispela wok bai karamapim ol studen yet, ol polis, ol autsait lain na sosel midia tu.

I gutpela olsem bai wanpela wok painimaut i kamap long painim as bilong ol trabel. Tasol bikpela askim nau em i olsem- i mas gat wanpela independen grup i go pas long mekim dispela wok.

Ol polis i no inap bikos ol wanwok bilong ol i sutim ol studen. Ol pipel i tingting planti nogut ol polis bai wansait long dispela wok painim aut.

Gavman i opim maus na i tok promis pinis, orait em i mas bihainim promis na kirapim hariap



Sekim gut stret na painim aut stret!!

dispela wok bilong painim as bilong trabel.

UPNG i tok save long dispela wik olsem ol studen i mas go bek nau long skul.

Yunivesiti i putim wanpela pablik tok save i go long ol studen, ol papamama na ol sponsa.

Dispela tok save i tok UPNG Kaunsil i bihainim disisen em i bin mekim long spesel miting long Jun 2 olsem ol i rausim saspensen bilong Semesta 1 Akademik Program. Bai ol i stre-tim program bilong 2016 olsem na UPNG Kaunsil, Senat na Ed-

ministresen i askim ol studen long go bek long skul.

Insait long dispela senis, bai skul long Medikol Fekalti i stat long 6 Jun, long 14 Jun ol studen long Waigani kempas bai go bek skul. Namba tu semesta bai stat long 25 Julai long ol studen husat i pas long Semesta 1. Na 2016 skul yia bai pinis long Sarere Novemba 5 we olgeta studen long Waigani kempas bai i mas lusim skul.

Skul i kisim kot oda tu long stopim ol studen i mekim gen ol protes.

Na ol studen husat i go bek long skul i mas sainim pepa we i tok ol i no inap long stap insait long protes.

Dispela protes long UPNG i bin kisim sapot bilong ol studen long Yunitek na ol studen long Goroka yunivesiti. Tasol i bin gat sampela trabel i kamap long Unitek long Lae na long Goroka.

Ol dispela trabel i kamap namel long ol studen yet. Olsem na dispela tupela skul i mas stre-tim hariap na larim ol arapela studen husat i laik skul i mas go bek long skul.

Wanpela bikpela hevi i bin kamap long Mosbi na ol arapela hap bilong kantri tu long las

wik, em ol hevi sosel media i ken kamapim. Long taim ol pipel i lukim ol poto na video long Facebook na Watsup ol i bilip na i no sekap pastaim long lusim sapos ol ripot i tru. Ripot we i tok polis i sutim 4-pela studen i dai em wanpela bilong ol dispela kain ripot i kirapim tingting bilong ol lain long pait na kamapim trabel.

Ol dispela ripot i mekim ol pablik long Mosbi i pret na ol opis na stua na skul i pas na ol pikinini i sotwin tru long painim rot i go bek long haus.

Yumi hop ol pipel i luksave tu olsem olgeta samting i kamap long sosel midia em i no tru. Sampela em ol tokwin tasol, sampela i bilong pretim nating ol pipel na sampela i bilong kirapim bel bilong pipel long kamapim trabel.

Gavman bai bungim na ol bikmanmeri bilong ol yunivesiti bilong kantri long dispela wik. Dispela miting i mas kliaim rot na larim ol studen husat i laik skul i go bek na pinisim skul bilong ol.

Ol pipel bilong PNG i luksave long protes bilong ol studen, tasol ol i mas go bek long skul. I gat taim long lukim dispela askim bilong ol studen i karim kaikai.

Wetim tasol 2017 nesene ileksen na putim mak long kamapim ol stretpela lida bilong kantri.

Gutpela bilong kantri i stap long han bilong famili

PLANTI manmeri i ken tokaut stret olsem sindaun bilong Papua Niugini i no olsem long bipo stat long 1970s na i go.

I bin gat bel isi na wan manmeri long ol ples, taun na siti i mekim wok bilong em yet na i no tingting long subim em yet o tingting bilong em long laip bilong narapela o long wok bilong narapela.

Moa yet i no gat tingting bilong bagarapim narapela manmeri, samting bilong em o long ol pablik samting. Nogat.

Na sapos i gat lidaman o atoriti i stap long komyuniti, manmeri i save bihainim tok bilong em na lo em i putim.

Skelim kain sindaun wantaim sindaun bilong tude, wanpela bai painim olsem dispela ol pasin i pinis.

Long taim bipo wanpela bai lukim papamama i gat gutpela laikim na rispek long tupela yet na ol pikinini bilong



tupela.

Taim hevi i kamap, ol i stre-tim gut na hariap.

Long tude dispela ol pasin i senis we no gat moa laikim na rispek i stap.

Long taim i no gat laikim na rispek i stap long famili, dispela i stat bilong sindaun bilong famili, komyuniti na kantri i bagarap.

Wanpela grup, Doctors Without Borders i bin ripot olsem Papua Niugini i wanpela bilong ol kantri we pasin bilong paitim meri na bagarapim em na ol pikinini i bikpela.

Sampela i tok em i pasin kastom bilong Papua Niugini olsem papa i ken mekim nabaut long meri na pikinini.

Ol i ting olsem ol man i lukim ol meri olsem ol i namba tu tasol bilong man na olsem ol meri i mas harim tok bilong man oltaim, maski sapos em i rait o i rong.

Tasol dispela toktok bilong man i mas rabisim o mekim nabaut long meri na pikinini i no tru.

Em i pasin bilong asde tasol na i no pasin kastom bilong Papua Niugini.

Long bipo taim famili, klen o traib i yusim meri long kamapim poroman pasin namel long wanpela famili na narapela o long wanpela klen na narapela, traib na komyuniti wantaim.

Na sapos wanpela i bagarapim meri, famili, klen o traib bilong man bai mas baim meri na lain bilong em long planti samting.

Dispela i wankain taim papamama i bagarapim pikinini.

Na olsem Skelim Tingting i ken tok olsem pasin bilong rabisim meri o pikinini i no pasin kastom bilong Papua Niugini. Em i nupela pasin na pasin bilong bagarapim komyuniti na kantri wantaim.

Long 2013, kantri i bin tok orait long wanpela lo we i tok long banisim ol meri na pikinini long papa i no ken bagarapim ol.

Long Baibel Buk Stat 2: 22 i tok long God i mekim meri bihain long em i kisim bun long sait bilong Adam.

Dispela i soim olsem meri i mas wok wantaim man na i no long man i bosim meri o meri i mas stap anit long oda bilong man o i bosim meri. Nogat.

Olsem na sapos yumi laik stap kantri i kamap gut, orait bai i mas stat long pasin laikim na rispek insait long famili.

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500
Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Ol Aitape bilong Rabaul

Nicky Bernard i raitim

RABAUl em i wampela ples planti manmeri long bipo i save laikim long go stap na wok, na kamapim nupela laip bilong ol.

Rabaul em i bikpela taun bilong ol Niugini Ailan, we ol bisnis manmeri bilong Niugini Ailan i save go long kisim ol kargo long bisnis bilong ol.

Bipo long maunten paia i pairap long 1994, Rabaul taun i pulim planti manmeri bilong ol narapela provins insait long Papua Niugini long go wok na stap long hap. Ol i no go bek long ples bilong ol.

Insait long Rabaul taun sampela ol Aitape lain i bin go wok na kamapim famili bilong ol bipo long 1970s. Dispela taim Rabaul taun long Is Nu Briten em i nais tumas, gutpela rot, ol plawa i save bilasim rot na planti ol stoa na opis i stap long en. Planti long ol bikpela skul tu i stap long hap.

Dispela ol Aitape lain long Wes Sepik i stap long Malaguna Namba wan na kamapim olsem ples bi-

long ol. Ol i marit na kamapim ol pikinini na nau ol i gat ol tumbuna tu.

Ol dispela Aitape man i no go bek long ples bihain long ol i pinis wok long ol bikpela kampani long Rabaul. Ol stap bek long ples bilong ol meri bilong ol na kamapim dispela ples go i bikpela.

Malaguna Namba wan ples i stap insait long Rabaul taun stret, tasol yu bai paul bikos ol haus bilong ol em pemenen na bai yu ting olsem em pat bilong Rabaul taun. Na tu, ples Malaguna em klin stret long wanem ol turis i save olgeta taim go long Malaguna long raun lukim ples.

Dispela ol Aitape lain wantaim ol famili bilong long Malaguna i bin rona we i go long Nonga taim maunten paia i bin pairap, taim olgeta samting pinis olgeta i kam bek na sekim ples na haus bilong ol. Olgeta samting i orait tasol das tasol i pulap long kapa bilong haus bilong ol.

Ol wantaim ol famili bilong ol i kirapim bek Malaguna Wan na ol

statim laip bilong ol gen na taim narapela pairap gen long maunten paia long 2004 ol wantaim ol famili bilong i no lusim Malaguna na rona we go hait. Ol i stap tasol na stretim ples bilong ol tasol long das bilong maunten paia.

Nau yet ol dispela Aitape lain i sindaun gut wantaim ol meri na pikinini bilong ol long Malaguna Wan long Rabaul Is Nu Briten Provins na dispela ples i kamap liklik ples bilong ol long Rabaul taun. Ol tu save pinis long tokples Tolai na ol i no moa save long tokples bilong Aitape.

Sapos yu bilong Aitape tu na go raun long Rabaul, bai yu paul long ol dispela boi ros bilong Malaguna long wanem ol i senis olgeta na kamap olsem ol Tolai stret.

Planti bilong ol pikinini bilong ol dispela Aitape lain i kisim wok long Rabaul taun na tu sampela i wok aut sait long narapela provins na taim bilong ol i malolo ol save go bek long Malaguna wan long wanem, dispela ples i kamap olsem ples bilong ol pinis.



Simon Mowkus em bilong liklik ples Malu long Malol long Wes Sepik, em go stap long Rabaul long 1980s na kamapim famili bilong em long Malaguna wan na stap inap nau.



Simon na Bernard Nasi i sanap wantaim. Nasi i go stap long Rabaul long 1970s na wok wantaim Elcom long CPL. Em pinis wok long taim na em stap yet inap long nau. Nasi em bilong Arop long Aitape long Wes Sepik.



Nupela jeneresen bilong Aitape na Rabaul. Pikinini meri bilong Pius Joseph.



Ol Aitape bilong Malaguna Wan.



Pius Joseph em bilong liklik ples Kainpin long Malol long Wes Sepik. Papa bilong em em kisim em na famili bilong em na ol go stap long Rabaul taim em(Pius)i liklik yet. Pius nau i no save long ples bilong em long Malol, em bikpela na stap long Rabaul tasol inap em tu marit na stap long Malaguna Wan. Pius i sindaun wantaim meri bilong em.

Aigir bilong Tolai bai pulapim yu

Kumu mosong em bilong karamap Aigir

Lukim wei bilong mekim Aigir bilong ol lain long Kokopo.

Nicky Bernard i raitim



Poto i soim lapun mama bilong mi wantaim tupela liklik susa i mekim Aigir long go salim long rot. Dispela karamap em K1.00 tasol long sait bilong rot maket. K1.00 tasol bel bai pulap tupela de.

MI go malolo long Is Nu Briten long tupela wik wantaim liklik mama bilong mi long wanem taim mi liklik yet, em bin lukautim mi taim mipela stap long Rabaul.

Liklik mama bilong mi i marit long man Hunamurmurples long Kokopo na em lusim Manus longpela taim na go stap long ples bilong man bilong em. Olgeta pasin bilong em i senis tu na em olsem wanpela meri Tolai stret.

Mi save gat sans long raun go long Kokopo taim mi wok, na mi save ringim em long kam lukim mi long wanem hap em mi slip long en.

Mi no gat sans long las yia long lukim liklik mama na taim mi kisim malolo long wok, mi pasim tingting long go lukim em wantaim lapun papa sapos tupela i strong yet. Mi no tingting long go malolo long Manus long wanem mama karim mi i dai pinis olsem na mi tingting strong long go lukim liklik mama we em bin lukautim mi.

Taim mi pundaun long Tokua ples balus mi ringim em olsem mi kamap pinis na bai mi kisim PMV na go long ples.

Lapun mama bilong mi i no westim taim, em go daun tasol long sait bilong haus bilong em na kisim ol banana na sampela kumu mosong arere tasol long haus bilong em.

Em kam skrapim kokonas na em grisim dispela kumu mosong we em kisim long sait bilong haus. Long sem taim tu, em boilim banana long wara nating.

Taim mi kamap long ples em olgeta samting i redi pinis, banana, kumu mosong na kulau. Em lukim mi na em karai liklik na tokim mi pikinini, traime liklik aigir mi mekim nating wantaim kumu mosong na kulau bilong yu long dring wara.

Taim mi opim dispela karamap lip banana, olgeta smel bilong kokonas na kumu mosong i mekim mi i hamgere moa. Mi no westim taim mi traime dispela kumu mosong wantaim banana mama bilong mi i mekim.

Dispela kaikai mi kaikai na mi no bin kaikai gen long nait inap narapela de. Dispela kaikai i holim bel bilong mi na i no gat spes bilong narapela kaikai.

Aigir bilong ol Tolai i save gat wei bilong mekim na i gat kain kain stail tu bilong mekim. Lapun mama bilong mi i tokim mi olsem dispela aigir mi kaikai em sot kat wei bilong mekim na i gat sampela wei tu i stap long mekim aigir.

Wanpela taim em wantaim tupela liklik susa bilong mi i mekim narapela kain aigir wantaim kumu mosong, tulip kumu, na tuna pis, ol Tulai save kolim sol pis.

Mi sindaun na lukim ol tripela i mekim bilong liklik susa long go salim long maket long rot long ples. Taim mi lukim tripela i mekim, maus wara bilong mi kam daun na mi no westim taim. Bipo long ol putim long karamap lip banana mi sot kat na kisim plet bilong mi go na liklik susa i seklim bilong mi.

Taim mi kaikai pinis mi askim long hamas ol salim dispela karamap, na mama bilong mi bekim na tok em K1.00 long wanpela karamap, mi givim K2.00 na mi kisim tupela karamap gen long wanem dispela aigir i swit moa yet.

Taim malolo bilong mi pinis na mi laik kam bek, mama bilong mi mekim wanpela liklik mumu long karim kam bek. Mumu tu em gat wei bilong mekim na i no wankain olsem aigir.

Mumu em bai yu kukim ston na bihain yu putim kaikai karamap wantaim lip banana go daun na bihain karamapim hotpela ston na yu pasim gen wantaim ol lip inap long narapela de bai yu rausim.

Wan wan provins i save gat stail bilong mumu tasol bilong ol lain long Is Nu Briten em stail tumas long wanem sapos yu kaikai na no gat abus long go wantaim, bai yu pinisim yet dispela mumu.

Tru tru, aigir bilong ol Tolai i save pulim ol manmeri na ol save lus tingting long kam bek long ples bilong ol.

Blu Lagun i blu tumas

Em ples bilong amamas long waswas

BLU Lagun em i wanpela hap yu mas go na lukim na waswas taim yu raun long Kokopo. Dispela liklik hap i save pulim ai bilong planti manmeri taim ol raun go long Kokopo.

Blu lagun i no longwe long Kokopo taun, em bai kisim samting olsem 25 o 30 minit tasol taim yu lusim Kokopo taun na ran olsem go long Rabaul. Yu bai i no inap abrusim long wanem i gat bikipela sain ol raitim Blu Lagun i stap arere long rot.

Tru tru solwara em blu na i kam olgeta long sait bilong bik rot bilong kar. Taim yu ran long kar bai yu lukim gut tru dispela blupela solwara na yu ting bai yu pundaun go stret insait long wanem ol kar bai ran stret long sait bilong em.

Ol ples klostu long dispela hap save go pulap long olgeta wiken. Ol bai waswas na amamas i go inap apinun na bihain ol bai wokabaut isi go long ples.

Ol ples mangi long hap save mekim kain kain stail long kalap go daun long blu lagun. Ol bai stap long wanpela sait bilong rot na wanpela mangi bai putim was long ol kar, taim em lukim olsem nogat kar em bai singaut long olgeta na bai ol resis long ron kam na kalap na mekim wan wan stail bilong ol bipo long ol go insait long solwara.

Dispela ol mangi save pulim tu ai bilong ol manmeri na taim ol ran long kar kam ol bai stop na lukim ol dispela mangi wantaim stail bilong ol.

Long apinun taim ol waswas

pinis na redi long wokabaut go bek long ples, ol save go long wanpela hul em ol soldia bilong Japan i bin digim long taim bilong Wol Woa 2. I gat wanpela fres wara i kam daun long en, ol save wasim ol gen long rausim solwara long skin bilong ol na bihain ol singsing na bihainim rot go long ples.

Wiken bilong ol dispela mangi klostu long Blu Lagun save kam gut tru. Ol ples olsem long Vunamurmur save kalapim maunten na kam daun na bung wantaim ol nambis ples bilong ol.

Blu Lagun tu save stail long apinun, taim san go daun na yu sanap long Blu Lagun bai yu lukim stret olsem maunten paia i stap klostu long yu na bai yu lukim ples klia stret.



Liklik susa bilong raita na tupela pikinini bilong em sanap long sait bilong Blu Lagun.



Ol mangi sanap antap long wanpela diwai i pundaun go insait long Blu Lagun.



Raita wantaim kandre bilong em insait long Blu Lagun.




Ol mangi i ran long wan sait rot go long narapela sait na kalap wantaim sail bilong ol go daun long Blu Lagun.




Ol mangi amamas insait long Blu Lagun bihain long ol mekim kain kain stail kalap bilong ol.

Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA



Man Trikim Tewel

Wanpela man, nem bilong en Korakan, em i gat bikpela ples karuka bilong em long bus tru. Nau long taim karuka i karim prut, i gat planti karuka prut bilong en tu. Taim bilong kaikai i kamap na em i go long haus bilong em na em i laik katim karuka. Em i bin katim sampela pinis na em i kilim tripela kapul.

Em i kam bek long haus em na brukim paiawut na kukim ston na brukim karuka na mumuim kapul. Taim ol i tan pinis em i tekeweim na wok long kaikai kapul na karuka. Bel bilong em tait tru long kaikai na em i slip i stap.

Long nait tru tupela tewel i kamap long man i slip. Man i opim ai isi na lukluk long tupela tewel man na pasim ai isi na slip. Em i bin autim akis ston bilong em bipo olsem het pilo na holim handel na slip na tupela tewel i lukim em na tupela yet i toktok i spik: 'Oلمان, wanpela man i dai pinis.'

Nau tupela i smelim haus bilong em, i trautim win i kam autsait na tewel i smelim. Nau ol i tok: "Oلمان! em i sting pinis ya." Narapela em i smelim as bilong man na man i hia i slekim bel na smel kamap long as bilong em, em smel nogut tru. Na tewel i tok: "Aa, longtaim em i sting pinis."

Nau wan tu tupela i wokim wanpela bet na putim olgeta samting bilong man na karim em i go long ples stret bilong man. Tasol wanpela i lukim mak bilong akis bilong em na i tok olsem: "Hia, lukim, em i holim handel bilong akis!"

Narapela i tok "maski, yu go. Yu giaman. Man i sting na em i dai pinis." Nau tupela i karim em i kam klostu long haus bilong man na long wanpela maunten i antap liklik long haus bilong em. Tupela tewel i pret tru, nogut, ol man i kilim tupela.


Long dispela maunten stret man hia i kisim akis isi na apim antap na givim stret long tewel i karim long lek bilong em. Na yau bilong dispela tewel i bruk pinis.

Na tupela tewel wantaim i ranawe nogut tru. Na tupela i tok: "Sapos wanpela man i dai long bus, larim em i sting na mitupela i no ken pren wantaim ol man."

Em tok promis bilong tupela i opim hul long wanpela maunten ston na i gat bikpela hul i stap. Dispela samting i kamap long ples bilong mi stret.

Simon Es, Wapenamanda E/D

Ansa bilong Wod Pilai isu 2178



C F R M N O D Q P Q A C O P D R P V M
E S M E R P A B E N G A B T E S G E
P R P T D I F R F E N S Q A S D
M Z F N B A I G L E T T O L U A D O N

- Ol wod lista: HANGRE, KAIKAI, KARUGA, LEPRA, MAISELIM, MEKIM, NATNAT, ONAIM, PESMAN, PLASTIK, RAITIM, SANDAUN, SEKBUK, SIKMAN, SMELSAVE, TAMBU, TEKEWEIM, TRENING, UMBEN, WOKIM, YUSIM

G G T P D T T F E N O T Z I C G F S N D R E S O L
L E N S E W A E I L A T P P O A S E X K T A G D S
I N M H E D H P G H G A E E X H Y S G H E M J D O
A O V T K E H O B J M M R M Q L X Y R S J E I I Z
D N E L X N K H R Y E G I I B H P S A R S K N N C
N T O Q N I E K M C V K L E R A E N U P R I J S L
C S L A T S N A N S O D Z A A N O J N K Q M W L O
H P S F S S L O A W O N M K I G D K I L I I O C P
E N S T Z Q X E R Y O I A G T R H T M L X R L E X
V A S X S A R N O L S S E I I E S F E O T T A Q D
N S H T S M M T C U E S I K M A N S P K R L S Y R
H N N S S I S R Y I K P O O L S I P C A E V S P I
U L Y E C L X K K H B T R P U A G E H R N W M E N
E M F Z M N I K A R U G A A M N E S B R I X E L G
R O A O M S R M I I K A E M T D K M E T N D L I I
N H T S O Y U J B A K B O T B A A A C C G B S A M
L S E L C L M G T Z E A H O B U Q N I N D L A B B
M Q R C I I B P R R S E I E E N A T N A T E V C S
O O K B R I E G H M S U C W M D A C E T P R E G Q
S B N O U H N R Y O L V F G I T T E O E R F M Z E



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

UPNG i kisim oda egensim ol ektivis sumatin



Wanpela UPNG sumatin ol polis i bin sutim long Pot Mosbi.

Sam Seke i raitim

YUNIVESITI bilong Papua Niugini Kaunsil i bin kisim wanpela kot oda bilong stopim sampela sumatin long pretim na wokim ol samting long stopim ol arapela sumatin long Waigani kempas long go bek long klas tumora.

Ekting Vais Sansela bilong UPNG, Dokta Nicholas Mann i tok yunivesiti menesmen i givim pinis dispela ristrening oda bilong kot long Studen Representativ Kaunsil. Em i tok ol i save pinis long wanpela liklik lain ektivis tasol i wok long kamapim ol trabel long

kempas. Dokta Mann i tok ol polis i ken arestim ol aninit long dispela ristrening oda sapos ol kamapim hevi long ol arapela sumatin. Dokta Mann i singautim tu ol pelanti handet sumatin bilong Solomon Ailan na ol arapela kantri long go bek long klas stat long tumora.

Vanuatu mosen bilong Review Committee

Sam Seke i raitim

PRAIM Minista bilong Vanuatu, Charlot Salwai i tok ol memba bilong oposisen i gat rait long no ken kamap long miting bilong palamen we bai toktok long wanpela gavman mosen, sapos ol i laik.

ing, Spika i putim mosen bilong kamapim wanpela Parliamentary Constitutional Review Committee i go long wik bihain. Mausman bilong Opis bilong Praim Minista, Hilaire Bule i tok gavman i gat 36 memba i bin stap long, tasol ol i nidim 38 memba long gohet long dibet long mosen.

Em i tok em bai wok bilong dispela Committee we bai gat ol memba tu bilong Oposisen insait long mekim rivi bilong konstitusen, na i no gavman tasol. Mista Bule i tok long wanpela senis long kontitusen i ken kamap, bai mas gat konsaltesen wantaim pipel raun long kantri na i mas gat referendum vot long en.

Birua long Mt Hagen bihain long polis i sutim ol UPNG sumatin

Sam Seke i raitim

Long Mount Hagen we i namba tri siti bilong Papua Niugini, pelanti bisnis i pas yet bihain long bikpela hevi we i bin kamap stat long Trinde. Ol hevi i stat taim ol sumatin bilong Hagen Park Secondary School i kros long harim na lukim long sosel media olsem ol polis i sutim ol sumatin bi-

long UPNG. Senia brodkasta bilong NBC Mount Hagen, Jack Tame i tok ol sumatin i bin go sutim long ston provin-sal polis hetkwata, ol polis kar na propeti. Em i tok ol arapela pipel long siti i joinim ol na i lukim ol i brukim ol stua, ol arapela bisnis bilding, olgeta benk i pas na ol brukim tu ol ATM masin. Jack Tame i tok ol i

brukim tu nesanel kot haus, distrik kot haus, olgeta gavman opis tu i bin pas na olgeta wokman meri i ranwe go bek long haus. CEO bilong Maun Hagen Siti Atoriti, Leo Noki i tok sori long olgeta lain husat i bin bungim hevi na i kondemim wanem i bin kamap olsem em i wanpela kriminal samting.

Fiu Haidro Pawa bai bikpela nesanel projek bilong Malaita

Sam Seke i raitim

OL wok i go het gut long bikpela nesanel projek bai kamap long Malaita Provins long Solomon Ailan, em Fiu Haidro Pawa Projek klostu long Auki taun. Auki em i kamap olsem namba tu bikpela taun long Solomon Ailan bihain long Honiara.

Hevi long graun wantaim ol papagraun i wanpela samting we i save stopim ol bikpela nesanel developmen projek long Malaita Provins. Tasol wanpela papagraun, Bernard Bata'anisia, i go pas long ol papagraun na ol i wanpela long dispela projek i mas go het.

Lukluk long ol arapela ples long PNG

Caroline Tiriman i raitim

Dispela stori i lukluk long wanem wei em i go het long Papua Niugini bihain long hevi i bin kamap bihain long ol polis i bin sutim ol yunivesiti sumatin long Pot Mosbi long las wik Trinde. Foapela sumatin i bin kisim bikpela bagarap long dispela trabel na moa long ten i bin kisim bagarap tu, tasol ol i bin kisim marasin na ol i orait. Dispela stori i bin kamapim pelanti wari na bel hevi long pelanti hap long kantri, long wanem ol papamama na ol pipel long ol provins i lukim na i tok, ol sumatin i gat rait aninit long mama lo bilong fridom ov asembli. Sampela ples i stap isi, tasol long sampela trabel i kamap long ol narapela. Ol sosel media stori i tok olsem, i bin gat

trabel long Simbu provins, tasol polis komanda long Simbu, Suprintenden Albert Belli i tok no gat trabel i kamap long provins. NBC Nius ripota long Goroka, Antonia Mission i tok Goroka i bin stap orait tu. Lain bilong Catholic Bishops Conference bilong Papua Niugini na Solomon Islands i mekim bikpela askim i go long gavman, ol polis na ol sumatin long bihainim pasin bilong Melanesia long toktok na stretim dispela wari bilong ol sumatin bilong UPNG. Jeneral Sekretari bilong Conference, Pater Victor Roche, i tok ol i tok Palaman i mas wokbung wantaim olgeta lain husat i stap long dispela hevi long painim gutpela rot long stretim dispela wari. Ol i tok tu olsem ol sumatin i givim stori bilong ol pinis na nau em i taim bilong ol i go bek long skul.

Pasifik i mas lukautim solwara

Caroline Tiriman i raitim

Solwara klostu long nambis i bikpela samting long laip bilong ol nambis lain long Pasifik na ol gavman long rijon i mas lukautim gut. Dairekta bilong Fisheries, Aquaculture na Marine Ecosystems Division long Pacific Community long Noumea i askim strong ol

lida bilong Pasifik long kamapim ol lo bilong lukautim gut ol kostal fiseri bilong ol long helpim fud sekyuriti bilong ol. Moses Amos i mekim dispela toktok bilong makim World Oceans Day. Narapela samting em Pasifikkomyuniti i mekim tu bilong makim dispela de em ol i autim wanpela liklik buk

long klaimet senis na fud sistem long ol Pasifik ailan. Mista Amos i tokim mipela olsem ol solwara bilong Pasifik i bikpela samting tru long laip na helt bilong ol pipel bilong rijon. Em i tok tu olsem maski ol solwara i gat pis, ol pipel i gat ol bikpela wari long helt winim pelanti ol narapela kantri long wol.

Hagen Haus sik i go het long wok

Sam Seke i raitim

MAUN Hagen Jeneral Hospital long Westen Hailans Provins i gohet long wok orait yet taim ol medikol wok lainl i wet long harim bekim long sampela askim bilong ol. Maun Hagen Jeneral em i bikpela rijional haus sik long Hailans we i gat klostu long 30 dokta, na moa long 200 nes na komyuniti helt woka. Insait long sampela mun pinis ol i no bin amamas long sampela samting long olsem wanem hospital i save wok na ol i tok long lusim wok bilong ol long protest. Senia NBC redio program opisa na presenta long Maun Hagen, Jack Tame i bin wok



Ol pikinini meri i skul long Notre Dame long Maun Hagen.

long bihainim dispela stori. Em i tok sampela wari bilong ol dokta na nes na ol komyuniti helt woka i stap yet. Em i tok dispela haus sik em i impoten tumas long ol pipel bilong Hagen na ol arapela hap long Hailans, na ol bai ol i gat bikpela hevi sapos em i pas.

Man i sutim 49 pipel long USA



Dispela man husat i lusim ol pren - i go long wanpela memorial long Orlando.

WANPELA man i kilim bikpela namba tru bilong ol manmeri long wanpela nait klap long Orlando, Florida long Sande, moning. Dispela man, Omar Mateen i gat 29 kris-mas, i bin sutim indai 49 pipel na bihain ol polis i brukim banis na go insait long klap na sutim em i dai.

Namba bilong ol pipel i dai long dispela birua em i bikpela tru i winim mak bilong ol arapelakain trabel olsem we ganman i sutim ol manmeri.

Mama i bin karim Omar long Nu York siti, bihain long papamama i bin lusim asples bilong ol long kantri Afganistan na go sindaun long Amerika.

Plis ripot i tok Omar Mateen i bin go insait long nait klap wantaim wanpela pistol na wanpela AR-15 semi otametik raifol na kilim indai 49 pipel na 53 arapela i bin kisim bikpela bagarap.

Ol lain husat i save long Omar i tok em i wanpela man husat i bin wok olsem wanpela sekyuriti gad olsem na em i gat laisens long baim gan. Em i wanpela Muslim husat i save go lotu tasol em i no gat ol pren na i no save toktok wantaim lida long lotu bilong em.

Ripot i tok Omar Mateen i no bin gat dairek link wantaim ol Islamic State militen tasol long taim em i wok long kilim dai ol lain long

naitklap, em i bin ring na tok em i sapotim teroris grup ISIS.

Bihain long dispela birua, ol ripot i kamap ples klia nau i soim olsem Omar Mateen i wanpela man i save belhat na paitim meri bilong em. Meri bilong em Sitora Yusufiy i bin lusim em bikos long dispela pasin bilong paitim em oltaim. Ol i bin marit long 2009 na marit i bin bruk bihain long 4-pela mun tasol.

Omar Mateen i bin wok long G4S sekyuriti kampani stat long 2007 inap em i kamapim dispela birua, olsem na em i save karim gan long wok bilong em.

Ol lain bilong FBI i bin toktok wantaim Mateen bipo bikos em i bin sapotom ol lain militen bilong Islamik grup. Namba wan taim ol i bin toktok long em i bin kamap long 2013 bihain long em i bin mekim ol strongpela toktok i sapotim ol teroris. Long 2014 ol i askim em sapos em i gat koneksen wantaim Mona Mohammad Abu-Salha, wanpela sitisen bilong Amerika husat i kamap wanpela suisaid boma long Syria long 2014. Tasol ol i painimaut olsem Omar i no pas tumas wantaim Abu-Salha na ol i no ting em bai kamapim trabel.

Long Mande, ol gavman opisa i tok ol i no painim sapos Omar Mateen i wok wantaim ol lain teroris bilong Islamic State.



Ol manmeri long olgeta hap long USA i bung long soim sori bilong ol long dispela birua i kamap long Orlando.

Briten redi long vot lusim EU

PLANTI pipel i soim sapot long Briten i mas bruk lusim Yuropian Yunion (EU). Ol wok painimaut nau i soim olsem moa pipel i laik lusim EU.

Ol pipel bilong Briten bai vot long Jun 23 sapos ol i laik stap olsem wanpela memba bilong EU o nogat. I gat 28 memba bilong EU tude. Sapos Briten i lusim EU, bai i gat sampela hevi i kamap long wok politik, ikonomi bilong kantri na wok bilong ol gavman namel long ol kantri long Yurop.

Kwesten long vot pepa em, 'Yunaitet Kingdom bai stap memba bilong Yuropian Yunion o lusim Yuropian Yunion?'

Ripot i soim olsem long taim gavman i tokaut long dispela referendum long mun Februeri, hap namba bilong pipel i tok ol i laik stap



Ol pipel bai vot long referendum long Jun 23.

memba na narapela hap i tok ol i laik bruk lusim EU. Tasol nau, ol ripot i tok moa pipel i laik bruk lusim EU.

The Times niuspepa i tok ol i painimaut olsem 46 pesen bilong ol pipel i laik bruk lusim EU na 39 pesen i tok ol i laik stap wantaim EU.

Narapela niuspepa ol i kolim Daily Telegraph i tok 49 i laik bruk lusim EU na 48 pesen i tok ol i laik stap wantaim EU.

Tupela ICM polls long wiken i soim olsem 53 pesen i laik lusim na 47 pesen i tok ol i laik stap wantaim EU.

Ol teroris long Filipins kilim Robert Hall

PRAIM MINISTA bilong Kanada, Justin Trudeau i tokaut olsem ol lain teroris bilong Filipins i kilim wanpela man bilong Kanada, Robert Hall bihain long no gat man i baim mani ol i bin askim long en.

Ol dispela lain teroris, Abu Sayyaf, i bin holim pasim Robert Hall wantaim John Ridsdel las yia na i bin kilim Ridsdel long mun Epril long dispela yia.

I gat wanpela sitisen bilong Nowei na narapela bilong Filipins yet ol dispela lain teroris i holim i stap yet.

Gavman bilong Kanada i mekim strongpela tok save olsem ol i no inap long baim mani ol teroris i askim long en bikos dispela pasin bai mekim ol teroris i holim gen moa pipel bilong Kanada na askim long mani.

Presiden Trudeau i bin tokaut long indai bilong Hall bihain long ol teroris i bin katim nek bilong em.

Lokal nius media i bin kisim ripot long Abu Raami, wan-



Pastaim Abu Sayyaf i bin askim long \$29 milien long Robert Hall.

pela mausman bilong Abu Sayyaf, i ringim ol long Mande na tok save olsem ol i katim nek bilong Hall. Em i tokim ol we ol polis i ken painim bodi bilong Hall. Long Tunde moning, ol ami i tok save olsem ol i painim het bilong Hall long Sulu provins.

Long taim ol Abu Sayyaf i bin holim Hall wantaim Ridsdel las yia, ol i bin askim long \$29 milien long wan wan bilong dispela tupela man. Tasol long kirap bilong dispela yia, ol i bin daunim kam daun long \$8 milien. Ol i kilim Ridsdel long mun Epril na i tok sapos ol i no kisim

dispela mani long Mande, bai ol i kilim Hall. No gat man i baim dispela mani olsem na ol i katim nek bilong em.

Dispela teroris grup Abu Sayyaf i save stap long saut hap bilong Filipins. Ol i gat nem bilong holim pasim ol autsait lain na askim long mani, na pasin bilong katim nek bilong ol birua bilong ol. Sekyuriti i no strong tumas long dispela hap we long 2014, gavman bilong Filipins i bin sainim tok orait wantaim dispela bikpela Muslim rebel grup long stopim ol trabel dispela grup i save kamapim inap 45 yia.

Pistorius i sikman na i no mas kalabus

WANPELA saikolojis i tokim wanpela kot long Saut Afrika olsem Oscar Pistorius em i wanpela sikman na mobeta em i no mas go kalabus long kilim indai gelpren bilong em Reeve Steenkamp. Tasol ol lain prosekiuta i tok Pistorius i no soim olsem em i sori.

Pistorius i gat 29 krismas na i bin winim gol meda long Paralympic Games bikos em i gat giaman lek. Ol i givim em nem, Blade Runner bihain long em i winim gol medal.

Em inap long kalabus 15 yia bihain long ol i senisim sas bilong em long manslota i go

long meda. Pistorius i bin sutim gelpren bilong em long 2013 bihain long em i tok olsem em i ting wanpela trabelman i bin kam insait long haus.

Jonathan Scholtz, wanplea saikolojis bilong Pistorius, i tokim kot olsem Pistorius i kisim marasin bikos em i sik long het.

'Em i sikman na mi ting em i mas go stap long haus sik. Long 2013 i kam inap nau, em i save pret tru long taim em i harim pairap bilong gan. Em i no laik tru long holim wanpela gan.'

El Nino bai kamapim moa CO2 long 2016

DISPELA yia, 2016, bai namba wan taim tru mak bilong kabon daioksaid ges (CO2) i abrusim 400 pats pe milien, long taim ol i sekim riding long Mauna Loa volkeno long Hawaii. Dispela ripot i kam long opis bilong UK Met Opis.

Ripot i tok long taim ol i wok long kisim riding bilong kabon daioksaid long sampela mun nau, ol i painim olsem mak i go antap bikos long El Nino i senisim klaimet long planti kantri long tropiks.

Dispela kondisen i stopim ol diwai long kisim CO2 i stap long klaut na i wok long kamapim planti bikpela paia long wol. Ol dispela paia i wok long kamapim moa kabon i go antap long klaut.

Ol saveman i tok dispela bikpela namba i no inap senisim wanpela samting. Tasol em i soim olsem yumi ol man i wok long kamapim senis long klaimet hia long graun.

Oltaim riding long Mauna Loa i save soim CO2 level i go antap long taim bilong winta na i pundaun i kam daun long taim ples i hat gen, tasol las yia, tripela mun tasol i soim mak i stap daunbilong long 400.

Ol ripot i tok, mak bilong CO2 i go antap long dispela yia, bai i winim mak bilong El Nino long 1997/98 bikos ol man i kamapim 25 pesen moa ges. Ol i tok dispela mak bai i no inap long senis hariap bikos graun i save senis isi isi tru.

Mulacek lus long kot



Ges bilong Antelope i paia long taim bilong mekim flea tes. *Poto: InterOil Corp*

PASTAIM Siaman na Sif Eksekutiv Opisa (CEO) bilong InterOil Corp, Phil Mulacek, i lus long kot taim Suprim Kot bilong Yukon i mekim disisen long larim InterOil i go het na holim Anual Jeneral Miting (AGM) na Spesel Miting bilong ol seaholda.

Dispela tupela miting i kamap pinis long Grand Salon long New York Siti long Amerika long Tunde long dispela wik.

Mista Mulacek, husat i gat 7.6 pesen seaholding wantaim arapela ol liklik grup bilong seaholda, i bin les long dispela AGM na Spesel Miting i kamap long Jun 14 dispela yia.

As tru bilong kamapim dispela miting em long givim ripot bilong kampani long ol seaholda, na tu long dispela spesel miting ol bod na menesmen bilong InterOil Corp i bin askim ol seaholda long vot egensim ol plen bilong Mista Mulacek.

Long las wik Fonde, InterOil i tok Suprim Kot bilong Yukon i mekim disisen long larim dispela miting i go het, na kot i stopim Mista Mulacek long no ken stopim dispela tupela miting.

InterOil i tok dispela miting i kamap pinis long dispela wik Tunde long New York.

InterOil i tok long Julai 28, i gat narapela Spesel Miting bilong ol seaholda bia kamap. Long dispela miting, ol seaholda bai bung gen na toktok long dispela plen bilong Oil Search long baim InterOil long K7 bilien (US\$2.2).

Ol manmeri o kampani husat i holim ol komon sea, opsens na ol ristriktet sea yunit (o bungim olgeta wantaim "Sekyuritisholda") bai bung gen long dispela mting long toktok long larim Oil Search i baim InterOil.

Ol bod memba bilong InterOil i tok dispela plen bilong larim Oil Search i baim InterOil em i gutpela plen bikos ol seaholda bai kisim benefit yet.

Ol seaholda husat i gat moa sea long Jun 20, 2016 bai go long vot long dispela namba tu Spesel Miting long Julai 28.

Sapos yu wanpela seaholda bilong InterOil, putim ai long Menesmen Infomesen Seikula we ol bai putim olgeta infomesen bilong dispela miting long em.

InterOil i askim olgeta seaholda bilong em long votim 'wait proksi' long larim ol dairekta bilong InterOil i stap yet long bod bilong kampani, na no ken bihainim toktok bilong Mulacek, husat i laikim ol seaholda long makim nupela dairekta.

InterOil i tok ol dispela man we Mista Mulacek i makim long larim ol seaholda i votim ol i kamap dairekta, i no fit long kamap dairekta bilong InterOil bikos ol i no gat bikpela ekspirens.

Long dispela as, InterOil i laikim ol seaholda long vot egensim plen bilong Mista Mulacek, na vot long larim ol dairekta bilong InterOil, husat i stap nau, i stap yet long bod.

InterOil i tok ol dairekta bilong kampani, husat i stap nau, i mekim planti gutpela wok na wok bilong ol i apim veliu bilong ol seaholda i go antap.

Wanpela bilong planti ol gutpela samting ol bod bilong InterOil i mekim em i dispela bikpela plen long larim Oil Search i baim InterOil.

Dispela bai helpim ol seaholda na strongim gro bilong sea ol i gat long InterOil, kampani stetmen i tok.

InterOil i tok Mista Mulacek i laik kam bek gen long InterOil na kontrolim bod ov dairektas bilong InterOil wantaim ol nupela bod memba we em yet i makim.

Ol dispela nupela memba bilong bod we Mista Mulacek i laikim ol long kisim ples bilong nau bod memba, ol i no gat gutpela ekspirens na save long ranim oil na ges kampani.

InterOil i tok tu olsem ol dispela nupela man, husat i laik kamap dairekta long nem bilong Mulacek, em ol wok man bilong Mulacek na ol poroman bilong em.

Mista Mulacek i no kamautim wanpela gutpela plen long larim kampani i bihainim dispela plen na helpim ol seaholda i kirapim veliu.

InterOil i tok dispela plen bilong Mulacek long kam bek gen na kontrolim kampani bai no inap helpim kampani na ol seaholda bilong em.

Tasol Mista Mulacek i tok ol bod memba bilong InterOil i planti tumas. Las wik em i bin tok bikpela mani bilong ol investa na seaholda i wok long pinis hariap long peim ol bod ov dairekta.

"InterOil i gat 10-pela memba bilong bod ov dairekta. Plen bilong mi em long katim daun dispela namba i kam daun long faiv na sevim mani," Mista Mulacek i tok.

Ol dairekta bilong InterOil na em ol, Chris Finlayson (Siaman), Dokta Michael Hession (CEO), Ford Nicholson (Deputi Siaman), Chee Keong Yap, Roger Lewis, Dokta Eliss Armstrong, Katherine Hirschfeld, Isikeli Taureka, Sir Wilson Kamit, na Sir Rabbie Namaliu.

Tasol Mista Mulacek i laik makim ol nupela dairekta na rausim ol dispela dairekta.

"Veliu bilong seaholda i kam daun taim ol dispela man i ranim kampani. Sea prais tu i kam daun. Ol i salim sampela ol asset bilong InterOil long liklik prais tasol," Mista Mulacek i tok.

Em i tok aninit long lukluk bilong em, sea prais bilong wan wan InterOil stok i bin stap antap long US\$50 tasol nau sea prais i kam daun.

Long Tunde dispela wik, sea prais bilong InterOil long New York Stok Eksens (NYSE) i kam daun long US\$42.04.

US\$1.01 i pundaun na dispela i soim olsem 2.35 pesen i kam daun. Dispela pundaun bilong sea prais em i wanpela as we Mista Mulacek i laikim nupela bod i mas kontrolim na ranim kampani.

Tasol Suprim Kot bilong Yukon i les long Mista Mulacek i stopim AGM na Spesel Miting. Dispela i no rausim Mista Mulacek long mekim sampela moa samting long kontrolim InterOil gen.

Mista Mulacek, husat i gat 7.6 pesen sea long InterOil i wok long painim sampela nupela rot long go bek long InterOil, sampela save man bilong oil na ges i tok.

Ol i tok Mista Mulacek em i wanpela kain man we em i bin statim InterOil olsem liklik kampani na nau InterOil i laik kamapim namba tu LNG Projek bilong PNG.

"InterOil i no gat ekspirens long ranim LNG projek. Gutpela na ol bod i salim kampani long Oil Search," ol save man i tok.

Long wankain taim PNG Gavman i sapotim Oil Search long baim InterOil. Praim Minista Peter O'Neill i bin tok dispela plen bilong Oil Search long baim InterOil em i gutpela plen bikos gavman na pipel bilong PNG bai kisim bikpela benefit.

"Gavman i gat 10.1 pesen sea insait long Oil Search. Taim Oil Search i baim InterOil, mipela i amamas olsem veliu bilong sea bilong gavman bai go antap na dispela bai bringim planti benefit i kam long PNG," Mista O'Neill i bin tok.

Tasol Indipenden Konsiuma na Kompetisen Komisnin (ICCC) i tok dispela plen bilong baim InterOil bai brukim sampela lo bilong kamapim kompetisen long oil na ges industri long PNG.

CEO bilong ICCC, Paulus Ain, i tok gavman i mas lukluk gut long dispela trenseksen na larim tupela kampani wantaim i bihainim lo long tekova long InterOil.

Mista Ain i tok ol maus man bilong Oil Search na InterOil i wok long toktok wantaim ICCC long stretim dispela, na larim tupela kampani i bihainim lo na mekim bisnis.

Oposisen Lida Don Polye i bin sapotim tingting bilong ICCC bikos em i laikim pasin bilong kirapim kompetisen long oil na ges industri long PNG.

"I no long oil na ges industri tasol. Olgeta industri long PNG i mas lukim kompetisen. Gavman mas larim kompetisen i kamap," Mista Polye i bin tok.

Kampani mas putim mani long PNG



NCD Gavana Powes Parkop long Palamen las wik.

NCD Gavana Powes Parkop i askim sapos Palamen i ken kamapim wanpela lo long larim ol mani bilong foren kampani i stap long ol komesel benk insait long PNG yet.

Gavana Parkop i les long mani bilong kampani bilong narapela kantri, husat i mekim bisnis long PNG, i lusim kantri na go ausait long narapela kantri.

Mista Parkop i autim dispela tingting las wik long Palamen taim em i lukim olsem PNG i nidim foren karensi o mani bilong narapela kantri olsem Amerikan Dola long larim ol arapela bisnis haus i mekim bisnis.

Taim foren karensi bilong narapela kantri i sot, dispela i lukim planti ol bisnis haus na kampani long PNG, i hat long mekim baim ol samting long ovasis na kisim i kam long PNG.

"Yumi ken stopim dispela pasin bilong larim ol kampani bilong narapela kantri, husat i gat bisnis operesen

long PNG, i salim mani i go bek long kantri bilong ol.

"Ol i ken putim mani long ol komesel benk i stap long hia," Mista Parkop i tok.

Mista Parkop i tok planti ol kampani na bisnis haus husat i mekim bisnis long forestri, maining, oil na ges i wok long salim mani i go bek gen long kantri bilong ol o long narapela kantri.

"Sapos yumi kirapim dispela lo, yumi ken tokim ol long kisim dispela olgeta mani i kam bek long kantri, na larim i stap long ol komesel benk," em i tok.

Ol komesel benk em ol benk o haus mani olsem BSP, ANZ, Westpac na nupela Kina benk.

Mista Parkop i tok planti ol kampani bilong arapela kantri i save les long putim mani long ol komesel benk long PNG.

"Yumi mas stopim dispela pasin. Kantri i nidim foren karensi. Sapos gavman i larim dispela mani long stap long kantri na ran long

ikonomi, mi no ting yumi bai nidim foren karensi," Mista Parkop i tok.

Praim Minista Peter O'Neill i sapotim toktok bilong Gavana Parkop.

Mista O'Neill i tok Palamen i ken kamapim dispela kain lo long stopim ol kampani long kisim mani i go aut.

Tasol sampela ol maining na oil na ges kampani i save sainim agrimen wantaim gavman long larim ol ken salim mani i go aut long kantri, Mista O'Neill i tok.

"Em bai hat long gavman i brukim ol agrimen bilong dispela kain ol kampani. Yumi ken mekim dispela lo we Gavana Parkop i tok long en.

"Ol kampani long forestri na na fiseris sekta i ken putim mani bilong ol long ol komesel benk long PNG.

"Tasol long ol bikpela maining na petroleum kampani em bai hat liklik bikos ol i save sainim agrimen long kisim risos i go aut na mani tu save go aut," Mista O'Neill i tok.

Bisnis bai kisim taim long hevi bilong yunivesiti

WANPELA save man bilong ikonomi i tok gavman i mas stretim ol hevi bilong ol yunivesiti sumatin hariap.

Eksekutiv Diarekta bilong Institut ov Nesenek Afeas, Paul Barker, i tok gavman imas stretim ol hevi i kamap long ol yunivesiti long Pot Mosbi, Lae na Goroka bikos dispela kain hevi isave bagarapim bisnis.

Mista Barker i tok sampela ol kampani na bisnis haus i bin lusim mani taim dispela ol hevi i kamap, stat long las wik bikos ol ipret long ol raskol bai brukim stua o bisnis bilong ol taim ol yunivesiti sumatin iprotes.

Ol raskol i bin brukim Bismillah Supa Maket long Gerehu long Pot Mosbi long las wik Trinde moning.

Dispela taim, ol sumatin bilong UPNG i bin laik long protes go long Palamen na polis i bin sutim ol long Waigani kempas.

Mista Barker i tok ol raskol man i ken mekim dispela kain pasin long sampela ol stua na bisnis haus long Pot Mosbi na arapela senta long PNG olsem Goroka, Lae na Mt Hagen.

"Sapos gavman i no stretim dispela kain hevi hariap, ol bisnis haus, ol kampani na ol investa bai no inap gat bilip long sekyuriti bilong invesmen bilong ol," Mista Barker itok.

Taim ol kampani i lusim tras long gavman, ol nupela investa bai les long kam mekim bisnis long PNG.

Dispela i ken daunim mani mak we gavman i save kisim takis, na tu em bai no inap kamapim planti wok mani long kantri.

"Ikonomi mas ran gut. Manmeri mas wok mani long sapotim laip. Gavman mas kisim takis mani long ol bisnis.

"Dispela olgeta bai ran gut sapos gavman i stretim hariap kain ol hevi olsem bilong ol sumatin," Mista Barker i tok.

Em tok ai bilong intanesenek bisnis komyuniti i stap long PNG bihain long kantri i bin go pas long planti ol bikpela bung bilong bisnis na gavman.

Bikpela miting bilong APEC long 2018 bai kamap long Pot Mosbi na dispela kain hevi i mas stop hariap, em i tok.

KAML seaholda bai gat sans long baim sea gen

OL seaholda bilong Kina Asset Management Limited (KAML) bai kisim winmani o dividen long mun Ogas dispela yia.

Long wankain taim, KAML bai givim sans long dispela ol seaholda long baim gen sampela moa sea long kampani.

Dispela tupela samting i soim gutpela mak olsem KAML i ran gut long han bilong ol gutpela bod ov dairekta na ol investa tu i gat strongpela bilip long bihain taim bilong dispela kampani, ol saveman long BSP Capital i tok.

Sif Eksekutiv Opisa bilong Kina Grup, Syd Yates, i tok ol seaholda bai kisim 3t winmani long wan wan sea ol i gat long KAML long Ogas 5 long dispela yia.

Mista Yates i mekim dispela toktok long Tunde long dispela wik long Pot Mosbi taim em i laik givim ripot bilong kampani i go aut long Pot Mosbi Stok Eksens (POMSoX).

"Kampani i ran gut. Ol seaholda i nau gat sans long kisim dispela winmani na baim moa sea o inves gen long kampani.

"Ol bod ov dairekta i amamas long larim ol seaholda i inves gen long kampani taim kampani bilong yumi i wok long gro na kamapim planti gutpela samting.

"Kina i nau wok long givim gutpela fainensel sevis i go long o pipel bilong dispela kantri. Nau kampani i givim sans gen long larim ol manmeri

PNG i baim sea na kamap seaholda.

"Husat ol manmeri i baim pinis sea long KAML bai kisim winmani bilong ol long namba 8 mun. Ol bai gat sans tu long yusim dispela winmani long laik bilong ol yet, o ol i ken baim gen sampela moa sea long KAML," Mista Yates i tok.

Mista Yates i tok tenkyu long ol seaholda na investa husat i gat bilip strongpela long dispela kampani na baim sea.

Kina Grup em i wanpela biknem fainensel kampani we Mista Yates wantaim sampela ol bisnisman bilong PNG na ovasis i bin statim long PNG yet.

Wanpela sabsideri kampani ebilong KinaGrup em i KAML. Ol i bin kirapim KAML long helpim ol investa long PNG long baim ol sea na inves long ol kampani we KAML glasim olsem em i gutpela long invest.

KAML i gat narapela sabsideri kampani bilong em ol i kolim Kina Aset Menesmen Namba 1 Limited (KAM No.1 Ltd), na wok bilong dispela kampani em long holim ol invesmen bilong KAML.

Ol i bin statim KAML long Oktoba, 2007 na KAM No.1 Ltd long November 2007. Long Julai 2008, ol i listim KAML long Pot Mosbi Stok Eksens (POMSoX) olsem namba wan pablikli listet invesmen kampani long PNG.

Las yia tasol, ol i kirapim nupela komesel benk ol i kolim Kina Benk.

K1 milien lus long ol sof dring bilong Esia

PNG i save lusim K1 milien em inap long kisim long wan wan mun long takis mani i kam long ol kampani bilong mekim ol sof dring.

Kastoms Komisina Ray Paul i tok taim ol nupela sof dring bilong ol kantri long Esia i kam insait long PNG, dispela i mekim ol manmeri i baim ol dispela nupela sof dring long liklik mani, na planti ol kampani bilong PNG, husat i save mekim sof dring insait long kantri yet, i lukim bikpela kompetisen i kamap.

Mista Paul i tok dispela kompetisen i lukim planti manmeri i baim ol lo kwaliti sof dring i kam long Esia, na ol i les long baim ol sof dring

bilong PNG yet.

Mista Paul i mekim dispela toktok bihain long Kastoms i bin mekim wanpela odit long glasim na sekim gut hamas mani gavman i wok long lusim taim ol dispela nupela sof dring i kam insait long PNG maket.

"Dispela odit i soim olsem gavman i lusim K1 milien long wan wan mun insait long las faiv yia. Mipela i tok save pinis long ol kampani husat i save baim ol sof dring bilong Esia long

baim ol katen bilong sof dring long mani mak we gavman i putim.

"Mipela i givim ol dispela kampani tripela mun long bihainim dispela toktok. Sapos ol no bihainim, mipela bai sasim ol na rausim laisens bilong ol long baim ol sof dring i kam insait long PNG," Mista Paul i tok.



Mountain Dew em i wanpela feveret sof dring bilong planti manmeri PNG.

Nupela kampani redi long helpim ol manmeri baim haus

WANPELA nupela kampani i redi long helpim ol manmeri husat i painim haus long baim o rentim.

Nem bilong dispela kampani em i ANX Real Estate Brokers. ANX em i wanpela liklik kampani o SME bilong PNG yet, na em i stat mekim bisnis long dispela yia tasol.

Menesing Dairekta bilong ANX, Gilad Lev, i tok sapos ol manmeri i laik baim haus o rentim haus na ol i painim, kampani bilong em i redi long helpim ol.

"Mipela i save maketim ol haus bilong baim na rent. Sapos yu wanpela man o meri husat i painim haus bilong rent na slip, o haus bilong baim, mipela i redi long helpim yu.

Mista Lev i tok ol papa bilong haus, husat

i laik salim haus, o putim haus bilong ol long rent tu, i ken lukim ANX.

"Sapos yu laik salim haus, o putim haus bilong yu long rent, yu ken kam lukim mipela. Mipela i save sasim liklik mani.

"Mipela i laik helpim ol papa bilong haus i inves gut na kirapim bisnis bilong ol.

"Haus em i wanpela namba wan samting long laip bilong yumi olgeta.

"Sampela manmeri i save painim hat long sekim haus bilong rentim o baim. Mi laik askim ol long salim email kam long dispela adres; anxrealestate@gmail.com.

"Mipela bai putim nem bilong ol long data beis bilong mipela na toksave long," Mista Lev i tok.

Nupela toilet bilong kastoma bilong LDS

Paulus Tali i raitim

LUTERAN Developmen Sevis (LDS) transit haus i bin stretim toilet haus bilong en na ol i opim pinis.

Dispela toilet nau i gat tupela rum bilong ol meri na tupela bilong ol man we ol kastoma bilong ol bai yusim taim ol i stap long Lae long mekim ol wok bilong sios na ol narapela samting.

Luteran Developmen Sevis transit haus i stap bilong helpim ol sios lida na ol LDS Motiveta bilong ol distrik long yusim long taim ol i kam long taun bikos em i wanpela haus i no dia tumas long ol i baim na slip, na tu em i stap long hap we i no gat planti pipel na i no gat planti nois.

Eboc Gagau, meri husat i save lukautim transit haus i

tok tenkyu long ol bikpela kastoma bilong em olsem ol Kote Sios Lida, Dregerhafen Hai skul tisa na ol sumatin wantaim ol Jiwaka Sios Lida, Ramu Sugar tisa, Het Masta bilong Wagau Praimeri Skul Buang, ELC Yabim Distrik sios lida wantaim sponsa bilong Ben Woo, na PNG Power, husat i save kam slip olgeta taim long dispela transit haus.

Seketeri bilong Luteran Developmen sevis, Bonney Keoka i bin stap long opim dispela toilet haus. Mista Keoka i tok tenkyu long konstraksen tim long gutpela wok ol i mekim long stretim dispela toilet haus.

Kaunsela Pasto bilong Sotel Konsen, Jack Gagara i bin blesim toilet haus pas-taim long ol i opim.

Taim Pasto Gagara i

blesim toilet haus em i tok, dispela haus nau em i kisim blesing na em bai stap yet long lukautim ol kastoma husat i kam stap long transit haus na helpim ministri bilong LDS. "Bikpela samting em long givim bek olgeta samting long God na em bai blesing wok bilong ministri i go het," Pastor Gagara i tok.

Akaunten bilong LDS, Roy Gagau i tok, wok bilong stretim dispela toilet bilong ol man na meri i kostim said moa long K15,000. Mista Gagau i tok tenkyu long ol konstraksen tim long pinisim dispela haus long taim stret na long wankain taim tu Menesa bilong Transit haus, Misis Eboc Gagau, i tok tenkyu long komyuniti bilong Malahang long lukautim Transit haus.



Sotel Konsen Kaunsela, Pasto Jack Gagara na Seketeri bilong Luteran Developmen sevis, Bonney Keoka, i katim ribbon long opim nupela toilet haus bilong Luteran Developmen Sevis Transit haus. Foto: Paulus Tali.

EU na IOM givim wara, senitesen na egrikalsa sapot

YUROIPIEN Yunien (EU)na Intenesenel Ogenaisesen bilong Maigresen (IOM) i givim helpim long 65,000 pipel bilong Papua Niugini husat i bin kisim taim no gut long bikpela san long las yia i kam inap nau.

EU na IOM i bin opim wanpela piksa wara saplai long helpim ol provins we san i bin bagarapim ol wara na kaikai bilong ol aninit long wanpela wok bung wantaim program.

EU-IOM rispons i laik bringim klinpela wara bilong dring, helt haijin promosen, egrikalsa na long ol pipel bilong Hela, Enga, Jiwaka na Simbu provins.

Ol i bin opim wok bilong drilim wara na putim pam long wanpela seremoni we i bin kamap long Giraben Sigiri insait long Jiwaka provins, we EU Embeseda long Papua Niugini Ioannis Giogkarakis-Argyropoulos, wantaim IOM Rijonal Daireta bilong Esia-Pasifik, Dokta Nenette Motus, na ol Jiwaka Provinsal Edministresen i bin opim namba wan drill hul we bai bringim gutpela seif na klinpela wara i go long komyuniti we ol i bilip bai inap long stap longpela taim bihain.

Ol pipel tu i bin soim amamas bilong ol long Gavman bilong PNG, Yuropien Yunien na IOM long lukim hevi bilong ol na i kam long helpim ol.

Deputi Provinsal Edministreta bilong Jiwaka, Joe Karap, i autim tingting bilong em, "Dispela sapot em i soim gutpela samting we yumi inap long lukim na holim olsem seif wara na tu i kamapim wanpela seif ples bilong ol meri na yangpela gel long ol i ken kisim wara klostu tasol long haus dua bilong ol."

"Wara pam we mipela bai opim tude em i namba wan bilong 15 hul wara mipela i laik wokim insait long dispela projek. Tingting bilong dis-

pela em long stretim wari bilong 65,000 man, meri na pikinini husat i kisim taim long painim gutpela wara long taim bilong strongpela san.

"Ol pipel tu bai kisim 1,000 egrikalsa kit wantaim trening long wei bilong konsevesen fam na long senisim ol krop long graun bilong ol. Dispela bai opim rot bilong kamapim wanpela wei bilong egrikalsa sekta long ol pipel i ken gat ol kaikai na krop we inap stap longpela taim long bihain, taim ol i bungim wankain taim olsem." EU Embeseda i tok olsem,

Jiwaka Provinsal Edministresen i tok promis long putim wanpela wara pam we bai ran long pawa na ol bikpela wara tenk long holim wara longpela taim.

"Olgeta taim mipela i save tingim ol pipel pastaim long ol wok operesen bilong mipela na mi amamas long lukim olsem dispela komyuniti wok bilong ol pipel i kamap strong moa long ol ples we i bin kisim bikpela bagarap. Mi laikim dispela kain pasin bai go yet inap ol ples i kamap orait olgeta," Nenette Motus, Rijonal IOM Dairekta bilong Esia-Pasifik i tok.

IOM bai givim aut ol wara kontena wantaim wanpela kliia program bilong helt na haijin promosen we ol komyuniti helt woka bai yusim ol save bilong ol long wokim.

Ol i helpim long kamapim ol wara komiti na trenim ol volantia long stretim na lukautim ol pam.

Aninit long egrikalsa sapot, IOM i kamapim ol wok poromoan 'Masta Fama' long hailans. Ol dispela save man fama bai stiaim ol komyuniti bilong ol long soim wei bilong wok na givim teknikel save.

Moa long 6,000 NFI Kit o mekpas tu ol i bin givim ol pipel wantaim 3,000 sid na tul kit i go long ol Enga, Jiwaka, na Simbu provins.



Eu wokman na meri, Salo, Joneo na Trish i helpim ol pipel wantaim kaikai long taim bilong strongpela san o El Nino long hailans. Foto: CARE PNG



EU Embeseda long Papua Niugini, Ioannis Giogkarakis-Argyropoulos, IOM Rijonal Dairekta, Dokta Nenette Motus, na Deputi Edministreta Joseph Karap, i opim wanpela komyuniti wara pam insait long Jiwaka Provins las wik. Foto: Intenesenel Ogenaisesen bilong Maigresen (IOM)

Graham i bin mekim hai takol long Thurston

...tasol Graham bai pilai long Orijin gem namba 2

NAMBA Wan pilaia bilong Queensland, Johnathan Thurston, i bilip olsem em i no orait long ol bai sasim New South Wales pilaia, Wade Graham, long taim bilong makim ol skwat bilong Stet ov Orijin long em i bin mekim hai takol long em.

"Tasol, em i no gutpela takol," Thurston i tok.

Graham em i wanpela senis tasol i kamap long Blues tim, we em i bin kisim ples bilong Boyd Cordner bilong pilai long Orijin gem namba tu bai kamap long Brisbane long Trinda nait bilong wik i kam.

Long namba wan taim, Thurston i no bin amamas taim Graham i kisim hai takol long em na bihain em i bin kirap nogut long harim



Banis bilong Cowboys i holim strong Wade Graham.

olsem referi, Gerard Sutton, i no putim Graham long ripot.

"Em i no misim mi. Na ol i no ripotim em? Dispela i bikos long mi bin kirap?" Thurston i tok.

Skipa bilong Blues na Sharks, Paul Gallen, i egen-

sim ol toktok bilong givim penelti long Graham.

"Em i no tromoi han na em i no lokim em. Em i pulim jo bilong em," Gallen i tok.

"Mi ting olsem referi i givim penelti em i orait na JT em i 100 pesen rait."

Euro 2016 resis ...husat tupela tim bai resis long fainel long France?

EURO 2016 sempionsip fainel i stap klostu we tupela de i stap yet long resis i kamap.

Ol i bin senisim ol fomet o plen i minim olsem ol i skruim tonamen long 16 tim inap long 24.

Ol tim husat bai kamapim sampela gutpela taim long ol fainel we ol bai tingim yet em France, Spain, Belgium na England.

France bai go pas long Euro 2016 resis we resis bai kamap long asples bilong ol.

Long yia 1984, France i bin go pas long Euro resis na em i bin winim Euro taitel long dispela taim.

Spain tu i bin kamap wan-taim tim bilong em. Spain em i wanpela tim we olgeta tim i laik daunim ol bikos



Antoine Griezmann bilong France i sanap gut na kisim bal taim ol i laik atekim em long Euro 2016.

Gergia i bin daunim ol Spain long asples bilong ol long Madrid bipo.

Belgium i lukluk long resis strong long Euro 2016 bikos Red Devils long Belgium i save kamap namba wan na namba tu long wol aninit long namba wan tim bilong

via awod.

England em i no wanpela strongpela tim we em i save resis long ol bikpela tonamen, tasolem bai traim bikos em i gat planti bipo pilaia i bin pairap long taim bilong ol. Nau tu, planti pilaia i kamap na ol bai resis.

Vettel i pinis namba tu long F1 Grand Prix

SEBASTAIN Vettel i pinis namba tu long Grand Prix resis long Canada, bihain long, Lewis Hamilton, husat i wol sempion bilong Mercedes long Circuit Gilles Villeneuve.

"Mi kisim brek na kamap namba tu bikos tupela pisin i ran kam insait long rot bilong mi, tasol Lewis i go stret," Vettel i tok.

"Mi draiva bilong resis na mi bai go het na mekim wok painim aut long wanem as tingting yu bin daunim mi.

"Mi go long namba wan kona na mi lukim tupela



Sebastian Vettel i go pas long Lewis Hamilton long Montreal kar resis.

marit pisin (seagulls) i stap yet na mi lukim. Lewis i no lukim bikos kar bilong em i no ridim ol dispela kain

samting.

"Dispela tasol i pasim rot bilong mi na mi kamap namba tu long resis."

Nate Myles no Inap pilai long Stet ov Orijin resis namba 2



Jacob Lillyman i bin ran long taim bilong Stet ov Orijin namba 1.

NORTH Queensland Maroons i autim Nate Myles long Stet ov Orijin resis namba 2 bikos em i bin kisim bagarap taim ol Manly i bin pilai egensim ol Panthers long Sande.

Prop bilong ol Warriors, Jacob Lillyman, i kisim ples bilong Myles na dispela em i wanpela senis tasol i kamap long ol skwat bilong Maroons.

Taim ol i tokaut, kosa bilong ol Maroons, Kevin Walters, i preisim nem bilong Myles na i tok olsem Myles em i eksperiens pilaia na i bin pilai namba 30 gem bilong em long Orijin resis namba wan.

"Myles i bin go aut bikos em i bin kisim

bagarap long skru bilong em bihain long namba 6 minit taim ol Manly i bin pilai egensim ol Panthers. Em i bin go bek na pilai taim ol Panthers i nidim em klostu long bungim pinis taim bilong resis na ol Panthers i daunim ol Manly, 31-24, long Brookevale Oval.

Walters i tok, Sam Thaiday i bin kisim liklik bagarap long join bilong em bihain long ol Broncos i bin pilai egensim Canberra bai stap yet long baksait lain yet.

New South Wales Blues i bin tokaut long ol skwat bilong ol bihain long gem i kamap namel long Cronulla na North Queensland long Mande nait.

Sapota bilong Russia na England i pait long Euro 2016 resis



Pait i kamap namel long Russia na England sapota long Euro 2016 resis i bin kamap long Jun 12, 2016.

OL sapota bilong Russia na England i bin pait long Euro 2016 resis.

Wanpela senia futbol opisa na memba long Russia i apim nem bilong ol sapota bilong futbol long kantri bilong em long wankain taim na i tok olsem, ol sapota i strongim kantri bilong ol na em i nomol long ol i pait long taim bilong resis.

"Mi no lukim wanpela asua i kamap taim ol sapota i pait," Memba bilong federal asembli long Russia, Igor Lebedev, i tok.

Lebedev i pointim han long ol French atoriti long pait i kamap long Euro 2016 gem namel long England na Russia na i krosim ol

narapela tim opisa husat i toktok egensim ol sapota bilong Russia.

Ol French atoriti i tok, 150 sapota bilong Russia stap long pait i kamap long Marseille.

Ol eksekativ husat i go pas long Euro sempionsip i tok, ol bai rausim Russia na England long fainel bilong Euro sempionsip bikos ol sapota i kamapim bikpela pait.

Ol atoriti i sasim Russia bikos ol sapota i bin bagarapim ran bilong ol pablik long taim bilong resis.

Narapela resis bilong Russia i kamap long Trinde long Lille, Noten France, we ol i bin pilai egensim ol Slovakia.



Ramu NiCo promotim envairomen konsevesen wantaim Dinghalic sumatin



Dinghalic sumatin wantaim ol Ramu NiCo (MCC) wok lain.



Ol liklik pikinini bilong Dinghalic elementeri harim toktok.



Ol pikinini guria long lukim stap long bikpela opis.

TAIM ol pikinini i liklik yet ol i mas kisim ol gutpela skul toktok na save gut long gutela na stretpela rot long was na lukautim gut bus, graun, wara na solwara bilong yumi long Papua Niugini.

Dispela em bikpela astingting we i kirapim bel bilong Ramu NiCo Menesmen (MCC) Limited long las wik long givim tokorait long wanpela liklik skul long Sumgilar lokal level gavman kaunsil wod long Sumkar distrik long go harim ol toktok na lukim video long wok Kampani i save wokim.

Wokabout bilong ol dispela liklik elementeri sumatin i makim Wol Envairomen De, we Dinghalic Elementeri i luksave wantaim ol program bilong en long lukluk raun wantaim ol sumatin bilong en long ol sampela ogenaisesin long Madang.

Ramu NiCo (MCC) i amamas long kisim ol sumatin autsait long projek eria bilong en long go na harim ol toktok bilong envairomen na tu ol tisa na wanem ol bod memba blong skul i ken save wanem samting Ramu NiCo i go het long wokim long sait long lukautim bus, graun, wara na solwara bilong yumi.

Em tru olsem Ramu NiCo em divelopa bilong bikpela nikel/kobalt maining projek we i rausim ol mineral long graun, tasol em i gat ol program bilong en i stap tu long rihabilitesin o stretim bek wanem ol eria we em i kisim ol mineral long en.

Dinghalic Elementeri Skul em stap long Karkum viles na dispela eria em i stap insait long konsevesen bilong ledabek trausel. Dispela projek em wanpela komyuniti bes ogenaisesin (CBO) ol i kolim Makata i kamapim wantaim helpim i kam long ovasis long luksave long lukautim namba bilong ledabek trausel long nambis long Karkum viles na ol arapela insait long Madang provins na PNG.

Bod siaman bilong Dinghalic, Bob Khon wantaim deputi siaman, Willie Mayang i bin raitim leta na i

bin go toktok wantaim Senia Pablik Rilesens Opisa bilong Ramu NiCo (MCC), James Kila long bringim ol sumatin long harim toktok na luk-save long wanem samting Kampani i wokim long sait long envairomen.

Dispela em namba wan taim tru long Ramu NiCo Kopret Opis wantaim Helt, Sefti na Envairomen Di-patmen i lukautim na givim toktok long ol liklik elementeri sumatin bikos pastaim ol i save givim toktok long ol bikpela sumatin bilong yuni-vesiti, koles na sekenderi na praimer skul.

Ol Ramu NiCo (MCC) Kopret Helt, Sefti na Envairomen (HSE) opisa, Steve Opur wantaim Elizah Kamane wantaim Kopret Opis supavaisa, Mathew Yakai i givim planti gutpela toktok long ol liklik pikinini bilong Dinghalic Elementeri Skul long pasin bilong lukautim gut bus, graun, wara na solwara bilong yumi.

Ol sumatin i gat sans long askim sampela kwesten we ol opisa i bekim na tokklia stret long ol long wanem samting Ramu NiCo i save wokim long sait long banisim ol hevilo o birua.


Bikpela samting long dispela lukluk raun bilong ol sumatin bilong Dinghalic elementeri skul em long opim ai bilong ol na bringim kamap intres bilong ol long wok bilong maining taim ol i liklik yet.

Mista Kila i salensim ol sumatin long oltaim planim moa diwai long bus, graun bilong ol taim ol i katim daun o rausim wanpela diwai.

"Taim yu rausim wanpela diwai, yu mas planim bek tupela o tripela moa diwai long graun," Mista Kila i tok.

Mista Yakai i salensim ol liklik pikinini long skul strong, harim toktok bilong tisa bilong ol long skul na tu harim gut toktok bilong papamama long ples.

"Taim yu skul strong na harim tok bilong tisa na papamama, yu bai kamap gutpela saveman na meri long bihain na wok long maining indastri na kisim ples bilong mipela," Mista Yakai i tok.



Piniau i winim 200 mita resis insait long 20.97 seken

THEO Piniau, em i etlit aninit long Etletik PNG, i daunim rekot bilong Nelson Stone na i kamapim nupela rekot wantaim 20.97 seken long 200 mita resis i bin kamap long Jacksonville, Florida.

Piniau i winim dispela resis na em i kamap namba wan bilong Etletik PNG long 200 mita resis taim em i daunim bipo namba wan rekot bilong Stone em 21 seken.

Piniau i putim dispela rekot bikos em i bin ran long 400 mita resis pas, taim 45 minit i stap yet long ran long 200 mita

resis. Piniau i bin klokim 48.94 seken long 400 mita resis.

Dispela pefomens i mekim Piniau i stap pas long Mowen Boino long go insait long tim bilong go long Rio Olimpik.

Boino nau i mas ran klostu long 51 seken long 400 mita hedel resis long bungim rekot bilong Piniau bikos dispela em i las resis bilong em.

Fainel kwalifai resis bilong tupela bai kamap long Sarere (Sande long PNG taim), long Coral Springs, Florida.

Travertz i setim namba tri nesanel rekot

ETLIT Jacklyn Travertz i bin setim namba tri PNG nesanel rekot long las wiken taim em i tro-moi hama inap long 38.27 mita we em i bin daunim bipo rekot bilong em wantaim 1.04 mita long Nesanel Open Sempionsip long Lae.

Peniel Richard i rekodim 15.41 mita long tripol jamp na em i abrusim bipo nesanel rekot bilong em wantaim 6 senti mita, tasol ol i no tok orait long dispela mak olsem nesanel rekot bikos long level bilong wesani

stap long pit.

Nu Ailan etlit, Wesley Logorova, i daunim Richard long long jamp we em i bin winim distens mak long 6.76 mita.

Martin Orovo, husat i brons medal wina long 2015 Pasifik Gems, i bin kamap namba wan long 1500 mita na 800 mita resis.

Nazmie Lee Marai i bin kamap namba wan long 100 mita fainel resis bilong ol man long Sande apinun.

Malamut i kamap klostu long Wisil

NANCY Malamut em i rana bilong Etletik PNG, husat i ran klostu long namba wan rana, Toea Wisil, na i setim bikipela taim bilong em yet, 12.36 seken na i kamap namba tu long 100 mita resis.

Ol i senisim ol ikwipmen, tasol kala bilong ol i kamap namba wan," Presiden bilong Etletik PNG, Tony Green, i tok.

Long namba tu resis, Wisil i klokim 11.41 seken na Lyenne Nilmo long Kimbe, Wes Nu Briten provins, i klokim 12.55 seken long wankain resis.

Nilmo em i wanpela etlit tasol i bin makim WNB tim na i bin kamap long Sir Ignatius Kilage Stediam long namba wan taim bilong em.

Em i bin lusim Hoskins ples balus long 6.00 kilok moning long Sarere na i kam lukim



Toeas Wisil i sanap wantaim ol famili na wantok bilong em bihain long resis i pinis.

hap bilong resis long belo.

Nilmo i bin sanap long lain long resis wantaim Wisil long

100 mita resis bihain long wanpela aua long taim em i kam kamap long stediam.



Planti lain i bin pulap long Sir Ignatius Kilage Stediam, Lae, long taim bilong resis long las wik Sande.



Ol man i ran long 800 mita resis.



Ol meri i ran long 800 mita resis bilong ol.

GE na NRL i bung na promotim lig welbing long PNG

GE na Nesanel Ragbi Lig (NRL) i tokaut olsem tupela i mekim patnasip long promotim welbing program bilong lig long olgeta skul long kantri.

NRL welbing program i lukluk long helpim ol sumatin long mekim koneksen namel long pisikal ektiviti na mental wenes.

Klostu long 20, 000 praimer skul sumatin long Pot Mosbi, Is Nu Briten na Isten Hailans provins bai kisim helpim long dispela program na groim edukesen.

"PNG em i kantri bilong laikim Ragbi Lig na dispela program em i gutpela rot bilong strongim pawa bilong spot na kirapim tingting bilong ol pikinini long strongim welbing bilong ol," GE PNG kantri lida, Peter Loko, i tok.

GE i bin stap long PNG long yia 1952 na i bin splaim jenereta na propela bilong

kamapim pawa o tebain long Pot Mosbi Haidro Eletrisit Skim. Em i bin stap olsem i kami nap em i bin opim opis bilong em long long Pot Mosbi long Julai, 2014.

Kampani i lukluk long kamapim lokal kepabiliti na teknologi long sapotim PNG long ol namba wan eria bilong developmen olsem pawa, wara na helt.

NRL welbing i stat long wok wantaim ol tisa na klasrum long yia 2014. Ol i helpim long promotim helt na salim welbing mesej we ol i bin bungim 40, 000 sumatin long tupela yia i go.

"NRL program bai helpim ol sumatin long ol bai luksave long ol gutpela ektiviti, helt na gutpela laipstail," Jenerel Menesa bilong PNG NRL na bipo pilaia bilong PNG Kumul na Canberra Raiders, Mark Mom, i tok.

Wisil i setim nupela nesanel rekot



Toea Wisil i ran pas long 100 mita resis bilong ol meri long Nesanel Open Sempionsip resis i kamap long Sir Ignatius Kilage Stediam, Lae, long las wiken.

Lewete i resis long PNGFA presiden sia

PRESIDEN bilong Nesanel Kapitel Soka Asosiesen (PNGFA), Peter Lewete, i resis long Papua Niugini Futbol Asosiesen (PNGFA) presiden sia.

Lewete i stap namba tu presiden bilong Pot Mosbi Soka Asosiesen (PMSA) na em i bipo pilaia bilong soka.

Lewete i tok em bai kamapim nupela skul bilong soka long Papua Niugini long 10 yia i kam taim em i kisim sia bilong presiden.

“Mi bai strongim Rijinal Tonamen na bai makim ol nesanel tim na wina bai kamap sempion rijon bilong yia.” Lewete i tok.

“Wan wan rijon bai kamapim ol tonamen bilong ol yet na namba wan tim long premia divisen long ol wan wan lokel asosiesen husat i patna wantaim PNGFA bai resis. Wina bai makim rijon na resis long winim taitel bilong sempion rijon. Ol bai makim ol nesanel tim bihain long dispela resis.”

Lewete i tok, astingting bilong rijinal tonamen em bilong rijinal tim i mas i gat bikipela ekspiriens long makim nesnel tim.

“Yupela i no lukim dispela kain tim i makim nesanel tim we NSL i makim,” Lewete i tok.

“Mi bilip olsem planti top soka edministreta na gutpela nesanel pilaia i mas lukluk long dispela we aidia bilong NSL i kilim i dai soka long kantri.

“Tru tru, aidia bilong NSL i lukluk long ol intres bilong ol mani man. Na em i gem bilong ol man i gat mani.”

Long PNGFA Kap, ol maina premia tim aninit long premia divisen we wan wan lokel asosiesen i patna wantaim PNGFA tasol bai resis. Wina bai kamap klap sempion. Dispela klap bai i gat sans long resis long OFC klap sempionsip. Sapos klap i win long OFC klap resis, em bai go het na resis long wol klap sempionsip.

Long Fuzzy Wazzy Angel Kap em Australia na PNG bai salens. Dispela kap em i namba wan rot bilong holim strong bipo prensip namel long tupela kantri aninit long spot.

Teritorial Kap bai kamapim bikipela sens long futbol long PNG. “Long lukluk bilong mi, Teritorial Kap i ken senisim futbol long PNG olsem Stet ov Orijin gem i save mekim long ragbi lig long Australia.

“Gringol na Wait ba i pait long dispela kap i minim olsem Niugini na Papua bai resis,” Lewete i tok.

Em i tok moa olsem rot i op long ol bai makim ol pilaia bilong tupela klap long teritorial resis.

“PNGFA i mas kisim strong long sait bilong fainens. I gat ol sans bilong mekim bisnis i stap we PNGFA i ken go insait. Nau em i taim we ol skoa asosiesen long kantri ken yusim ol mani bilong ol yet long ranim soka na stretim ol hevi i kamap aninit long soka.

“Painim ol kopret sponsa husat bai fandim mani insait long longpela taim long ol dispela bikipela gem na senisim olgeta program i kamap nupela.

“Mi gat bikipela tingting na strong olsem plen bilong mi bai senisim futbol long kantri i kamap nupela.

“Taim mi kisim sia, futbol long PNG bai senis olgeta. Em bai no inap stap wankain olsem nau yumi lukim,” Lewete i tok.

Lewete i tok, ol narapela man tu i resis long dispela wok bilong soka long kantri i kempen pinis long winim sia. Sapos ol dispela kedidet i sanap strong long senisim soka long kantri, em ol i mas kam aut wantaim masta plen bilong ol long developim soka long bihain taim na larim olgeta pipel bilong kantri i mas luksave long dispela.



NAMBA wan rana na etlit bilong Etlek PNG, Toea Wisil i bin setim nupela nesanel rekot bilong Etlek PNG long Nesanel Open Sempionsip resis i kamap long Lae long las wiken.

Olsem ol i tok pinis long taim ol etlit i mekim wok redi long resis long Nesanel Sempionsip, we taim bilong Wisil i kamap namba wan tru wantaim gutpela fom bilong em long ran long gutpela klaimet na weda aninit long ai bilong bikipela asples sapota husat i singaut na sapotim em.

Long 100 mita resis bilong ol meri, Wisil i klokim 11.36 seken na i winim taim we Mae Koime i bin setim, 11.37 seken, long Brisbane, Australia, long Mas, 2007.

Nau, Wisil i holim nesanel rekot bilong 60

mita na 400 mita resis na sans bilong em long resis long Rio 2016 Olimpik em i op i stap.

Tupela kosa bilong Wisil, Tony Green na Alison Fairweather, i tok, hatwok bilong Wisil i karim kaikai.

“Mak we Toea i winim long las wiken long Nesanel Open sempionsip i kamap long hatwok we Toea i save mekim insait long 9-pela mun i go,” Green i tok.

“Toea i brukim dispela rekot long ai bilong ol famili na wantok bilong em na mama bilong em tu i bin lukim i stap na em i setim dispela nupela rekot.”

Wisil i bin go bek long Australia long mekim wok redi long go resis long Melanesian Sempionsip long Fiji long Julai.

Paradise Beverage i sapotim OFC



Tru Tru Wara

PARADISE Beverage i sapotim OFC resis aninit long botol wara “Tru Tru Wara” bilong ol, we ol i kamapim hia long PNG.

Sponsasip bilong ol i mani moa long K15, 000.

Paradise Beverages i helpim OFC wantaim Tru

Tru Wara sponsasip bikos dispela kampani i gat plen long helpim ol spot developmen insait long PNG long ol kain program we i ken hamamasim olgeta manmeri na pikinini long PNG.

Long dispela astingting, PB i amamas long sapotim

OFC resis na helpim PNG long kamap wanpela spot hap bilong Pasifik Ailan.

PB i amamas na tok tenkyu long PNG Kapul long ol i pilai gut na soim kala bilong PNG na bringim soka i go antap long nupela level insait long kantri.

CRE i stap top long Midia Pul snuka resis

TUPELA namba wan pilaia bilong tim CRE, Kelly Yambi na Welton Guy, i pilai gut long 5-pela raon na i stap pas long PNG Midia Pul snuka resis we Nesanel Geming Bod i sponsa.

CRE i no painim hat long kisim tupela poin long raun namba 3 na 4, 7 frem-0, taim ol i rausim tupela tim, Telinet na Pot Courier. Long raun namba 5, ol i isi tasol daunim ol Peoples Notice Board, 6-1.

Insait long resis i kamap long las wiken, planti tim ol i rausim na givim fri poin long ol birua tim.

“Resis i kamap orait long las wiken tasol sampela tim ol i bin rausim long resis. Ol eksekyutiv i lukluk long dispela na ol bai kamap wantaim wanpela toktok we ol dispela tim bai resis yet o nogat,” Dairekta bilong tonamen, Ephraim Kara, i tok.

Willie Walimbu na Colin Taimbari, i go pas long tim Patrons. Willie em i Olimpik pilaia i go pas gen long tim bilong em na daunim Teksol Keleone, 4-3, Vemps Media, 5-2, na NIIB Lamana, 4-3.

Maina premia bilong las yia, North Mirror, i daunim Pacific MMI, 7-0, Poi-Nangu, 6-1, na Parliament, 5-2, we 4-pela pilaia i go pas long dispela tim.

Resis namel long Dataco Pebbles na Cool Grafix i kamap strong tumas, tasol Grafix i daunim ol Pebbles, 4-3.

Papuan Blacks i bin pilai gut tu long wankain taim. Ol i bin daunim Education Media, 5-2, tasol lus long raun namba 4 we Keleone i daunim ol, 4-3. Long raun namba 5, Blacks i kisim strong gen na daunim ol Vemps, 6-1.

Auditor General i daunim Crime Stoppers, 6-1, na Pebbles, 5-2, long raun namba 3 na 4. Tasol, Cool Grafix i daunim ol long raun namba we skoa i sanap olsem 4-3.

Ol top 12 tim long MPC lata bihain long raun namba 5:

- 1 CRE wantaim 10 poin;
- 2 NIIB Laman wantaim 8 poin;
- 3 Auditor wantaim 8 poin;
- 4 Patrons wantaim 8 poin;
- 5 Pebbles wantaim 6 poin;
- 6 NEM wantaim 6 poin;
- 7 Keleone wantaim 6 poin;
- 8 Parliament wantaim 6 poin;
- 9 Papuan Blacks wantaim 6 poin;
- 10 Poi-Nangu wantaim 6 poin;
- 11 Cool Grafix wantaim 6 poin na
- 12 City Hall wantaim 4 poin

Ol opisal bilong PNG Midia Pul soka resis.



BAI YU GO WE: PNG Kapul pilai Daniel Joe i rausim bal long lek bilong pilai bilong New Zealand taim kepten bilong Kapul, David Muta, i putim was long gren fainol pilai bilong OFC.



TRAIM MI: Kosta Barbaarouses bilong New Zealand i traim ronawo long Awin Komolong bilong PNG Kapul. New Zealand win long penelti sutaut. 4-2.



KAM KISIM: Tommy Semmy i autim bal bipo long pilaia bilong New Zealand i traim long rausim long lek bilong em.



YUMI REDI NAU: Susa em maskot bilong yumi long Anda 20 wol kap soka we bai kamap long Pot Mosbi long mun novemba dispela yia.




PNG EM MIPELA YA: Ol trupela sapota bilong PNG Kapul.



AMAMAS: Ol pilaia bilong Hunters i amamas bihain long Zeming i putim las minit trai long mekim ol i winim Magpies 22-20.



HIT MAN: PNG Hunters hit man bilong ol, Adam Korave, i mekim wanpela bikpela takol long pilaia bilong Souths Logan Magpies long pilai bilong ol long NFS long Mosbi. Hunters i win long las seken 22-20.



DIANA Tuna

Niupela Swit Teist
Nau Igat Moa Oil!



PNG's ORIGINAL TUNA

PNG MADE Manufactured by:
RD TUNA CANNERS LTD.

PNG i redi long pilai egensim Malaysia

NU Silan i daunim Papua Niugini long fainel bilong Osenia Futbol Konfederesen (OFC) Nesens Kap resis, tasol ol i kirap gen bihain long sampela de na bai salensim Malaysia long wan-of gem bai kamap long Pot Mosbi long Fraide.

"Ol i lukluk long go insait long namba tri resis bilong Wol Kap kwalifai bai kamap long yia i kam," Kosa bilong PNG, Flemming Serritslev i tok.

Pilai bai kamap namel long PNG na Malaysia em i sans bilong promotim futbol long PNG, bihain long PNG kapul i winim bel na tingting bilong ol pipel bilong PNG long Nesens Kap resis.

"Planti sapota bai sapotim nesanel tim, PNG Kapul, na futbol gem insait long kantri, sapos mipela i pilai gut yet," Serritslev i tok.

"Mi ting olsem mipela bai mekim na planti pikinini bai amamas na stat pilai futbol.

Kosa i tok, "Nu Silan i win long OFC Nesens Kap fainel long las wiken long wanpela penelti kik i brukim bel bilong ol sapota, opisal na pilaia bilong PNG Kapul, tasol ol pilaia i redi gut long salens bai kamap long Fraide.

"I no gat wanpela asua i kamap na ol pilaia i save laik long pilai futbol na nau ol i lukluk long testim ol yet gen.

"Mipela i amamas long soim olsem

mipela i orait long resis egensim tim husat i stap antap long mipela long renk.

"Dispela resis bai skulim mipela gut long kamap namba wan pilai long tim na karim nem bilong kantri."

Pilai bai kamap long Fraide em i namba wan resis bilong ol Malaysia long tri-mets Osenia wokabaut bilong ol. Bihain long pilai bai kamap long Fraide, ol bai go long Nu Kaledonia long Jun 22 na bai go long Fiji bihain long 4-pela de.

MI SUSASA:

PNG i redi long pilai egensim ol Malaysia long dispela wik Fraide na ol i redi tu long FIFA Anda 20 soka resis bai kamap long Novemba long dispela yia long Pot Mosbi. Na long soim olsem PNG i redi, ol autim maskot bilong Anda 20 soka we bai raun na soim olsem yu PNG i redi. Dispela maskot em ol kolim Susa long bung ol yangpela meri bilong ol narapela kantri long kam pilai long PNG. Poto Nicky Bernard.





PMV

DIESEL OIL



BOROKO MOTORS

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2659
KOKOPO	☎	982 8193
GOROKA	☎	532 3552

Email: info@borokomotors.com.pg
Website: www.borokomotors.com.pg

PMV OIL BILONG YUMI